



Stad verbessert ka ginn, andeems datt och déi Diddelenger an de Genoss komme vun enger Direktlinn.

Soumat ass déi Motioun, déi hei vun de Kolleege vun der ADR virgeluecht ginn ass, inhaltlech novollzéibar, ech mengen awer, datt se zu engem falsche Moment kënn, well eben all Donnéeën um Dësch leien. A well de Minister ebe ganz kloer schonn an deene leschte Wochen derzou Positioun bezunn huet, menge mir och, datt se superfétatoire ass. Mir wäerte se als Demokratesch Partei och net stëmmen.

Ech hunn awer vläicht eng lescht Fro nach un de Minister, wat elo d'Streck tëschent Diddeleng a Beetebuerg ubelaangt. Do war emol eng Kéier ugeduecht ginn, fir zäitweis en Doublement vun där Linn virzehuelen, fir datt och kënnen zwee Zich sech kräizen. Dat heescht, datt am Fong geholl och d'Frequenz kann erhéicht ginn. Dat géif de Problem zu deem Zäitpunkt net léisen, mä en vue vun enger méiglecher Verbesserung tëschent Beetebuerg an der Stad, wa bis déi nei Streck amenagéiert ass, wier et awer vläicht net schlecht, och schonn zu deem Zäitpunkt sech doriwwer Gedanken ze maachen.

An, wéi gesot, ofschléissend nach därer een net vergiessen, datt de Minister awer och elo zougestanen huet, datt eng Rei Busverbindungen zousätzlech virgesi sinn, haauptsächlech tëschent Diddeleng an der Stad.

An e lescht Wuert nach kuerz iwwert de Problem vu Rëmeleng - Käl. Och deen ass bekannt. Mä d'Statistiken hu jo bewisen, datt „nëmmen“ - ech soen dat zwar elo zwësche Guillemeten - 90 Leit u sech direkt dovou beträff sinn. Ech mengen, heiansdo muss een awer och, wann een Decisiounen hëlt, dat Ratio-naalt, dat Ekonomesch matconsideréieren.

Wéi gesot ofschléissend, mir wäerten als Demokratesch Partei där Motioun hei net zustëmmen. Ech wëll den Här Gibéryen an engem Punkt hei korrigéieren. En huet behaupt, zu Diddeleng hätt all Partei, déi hei vertruede wär, dergéint gestëmmt (veuillez lire: derfir gestëmmt). D'Demokratesch Partei huet zu Diddeleng am Gemengerot net dës Motioun matgestëmmt.

► **Plusieurs voix.** - Firwat net?

► **M. Gusty Graas (DP).** - Firwat net? Well se net do vertrueden ass.

(**Hilarité**)

► **Une voix.** - An an deem nächste Gemengerot wahrscheinlech och net.

(**Brouhaha et hilarité**)

► **M. Gast Gibéryen (ADR).** - Här President, just fir ze soen: Ech hunn net gesot, am Diddelenger Gemengerot hätten all hei an der Chamber vertruede Parteien derfir gestëmmt, mä ech sot, an deenen dräi Gemengeréit. A Käl a Rëmeleng, mengen ech, do ass d'DP och iergendwéi anzwousch matvertrueden.

► **M. Gusty Graas (DP).** - Zu Rëmeleng hu mer se och net matgestëmmt.

► **M. Mars Di Bartolomeo, Président.** - An d'Wuert huet elo den Här David Wagner.

► **M. David Wagner (déi Lénk).** - Merci, Här President. Här Gibéryen, Dir musst oppasse mat méi kluge Parteien am Minett; deemno wéi weess een net onbedéngt, ob se vertruede sinn oder net.

Här President, bon, wem seng Schold ass et, datt mer an esou enger Situatioun sinn?

Ech mengen, mir wëssen dat all: Iwwer Jorzéngten ass keng uerdentlech ëffentlech Transportpolitik gemaach ginn zu Lëtzebuerg! Dat war inkompetent, et ass katastrofhal. Et misst ee sech heiansdo d'Fro stellen, wéi Lëtzebuerg vläicht géif funktionéieren, wa mer souguer nach manner Suen hätte wéi dat, wat mer hunn. Well heiansdo - do sinn essenziell Saachen, déi wierklech net funktionéieren hei zu Lëtzebuerg - muss ee sech d'Fro stellen, wien a wéi regéiert gouf.

Mä anerersäits gëtt et awer trotzdeem weiderhin och e Konsensus, fir ze soen, datt mer e Wuesstum brauche vu 5% oder 6%, datt mer massiv Aarbechtsplaze mussen unzéien, zemoos an der Hauptstadt. Aarbechtsplazen, déi meeschtens net besat gi vu Leit, déi iwwerhaapt hei liewen. An d'Leit, déi hei liewen, déi musse souwisou d'Land verloossen, well et ze deier gëtt. Soit! Dat ass déi Situatioun, an där mer sinn.

Dat heescht, et gëtt awer e richteg Konsensus hei am Land, fir e Wuesstum ze hunn, dee kee Sënn mécht, an anerersäits ass dann, bis viru Kuerzem, guer keen Effort gemaach ginn am Transportberäich.

Mir wëllen net als déi Lénk behaupten, datt déi heite Regierung am Transportberäich guer nääscht mécht. Mä et muss een awer bedenken, datt d'Sträichung vun eefle direkte Linne

vun Diddeleng an d'Stad wierklech e Problem ass, besonnesch well Diddeleng eng Stadgare ass, wou d'Leit och zu Fouss oder mam Vëlo kënnen kommen an esou defekt Mobilitéetskette keng Roll spillen.

Mir mengen, datt duerch d'Sträichung vun deenen Direktverbindungen d'Leit elo müssen op enger schlecht amenagéierter - dat ass schonn e puermol gesot ginn - Gare zu Beetebuerg ëmklammen, an dat hëlt hinnen natierlech och Zäit an Usproch.

Mir stëmmen déi Motioun awer mat, well mer net mengen, datt se superfétatoire ass, well an engem Land, dat am Verkéierschaos riskéiert ënnerzegoen, ass et zudéifst ongerecht an och e fataalt Zeechen, fir d'Zuchverbindung tëschent der Hauptstadt an der véierter Stad am Land einfach ze suppriméieren, ouni datt eng attraktiv a klimafreundlech Alternativ ugebuede gëtt.

Also et gëtt gesot, datt Alternativen do sinn, dofir bräichte mer déi Motioun net ze stëmmen. Et sinn e puer Saachen, wou mer kéinte soen, wat d'ADR hei seet, zum Beispill: Et dierf net manner Zuch gefuer ginn. Mir sinn der Meinung, datt nach méi Zuch misst gefuer ginn.

► **Mme Viviane Loschetter (déi gréng).** - Mir och.

► **M. David Wagner (déi Lénk).** - Voilà. Bon. Mä trotzdeem wäerte mer...

► **Mme Viviane Loschetter (déi gréng).** - Mir och. Jo.

► **M. David Wagner (déi Lénk).** - Trotzdeem wäerte mer déi Motioun matstëmmen.

(**Interruption**)

► **M. Mars Di Bartolomeo, Président.** - Merci. An d'Wuert huet elo d'Regierung, den Här Nohaltegkeetsminister.

Prise de position du Gouvernement

► **M. François Bausch, Ministre du Développement durable et des Infrastructures.** - Merci, Här President, an och Merci fir d'Bäitrag vun den Deputéierten.

Och ech respektiv d'Regierung deelt d'Suerge sougutt vun de Leit wéi vun de Gemengen. An et ass och net, well mer déi Suergen net gesinn oder net verstinn, firwat mer eng Rei Saachen decidéiert hunn, mä et ass aus deene Grënn, déi ech schonn an e puer Question-parlementaire méi wéi eng Kéier ënnerstrach hunn, firwat mer dat maachen.

Et ass och net ganz richtig, wann een et hei duerstellt, wéi wann d'Verbindung suppriméiert wär. Eischstens emol gëtt et eng Verbindung vun Diddeleng iwwer Beetebuerg an d'Stad. Et bleiwen och zwou Direktverbindungen bestoen. Dat gëtt ëmmer esou gär vergiess, wa mer doriwwer diskutéieren, Här Wagner. An zwar hu mer souguer déi Verbindung, déi bestoe bleift, och nach verstärkt.

Dat hunn ech och gesot, dat war op Basis vun Diskussiounen, déi ech mat der Diddelenger Gemeng hat - well et lafen och Gespréicher, et ass net esou, datt ech mat de Gemenge keng Gespréicher hätt -, do hu mer decidéiert, datt deen Zuch, dee virgesi war fir ze bleiwen als Direktlinn vun Dudelage-Usines, eischstens géif verlängert gi bis Volmerange-les-Mines, an datt mer dee verstärken, soudatt ganz vill Leit, déi dann eng Direktverbindung e bëssen duerno verléieren, kënnen zrëckgräifen op déi Direktverbindung, déi besteet, well déi da méi Kapaciteit huet.

Et ass och esou, datt an deem Gespréich mat deene Gemenge mer eng ganz Rei Saache proposéiert hu fir d'Iwwergangszäit, well hei geet et net ëm eng Suppressioun, et geet ëm eng Transitionsphas vun engem Fahrplang, deen, wëll ech awer soen, am Dezember, wann en a Kraaft wäert trieden, wesentlech Verbesserungen wäert mat sech bréngen, generell fir allegueren d'Utilisateuren, duerch nei Garen, déi opginn, duerch de Funiculaire, dee mam Tram am Zesammenhang steet, awer och duerch de Réseau, dee méi stabill gëtt.

Well et huet jo kee Wäert, datt mer Verbindungen oprecht halen, an d'Verbindungen funktionéieren net. Wann d'Zich Verspéidung hunn, wéi se se haten an deem leschte Joer, dann notzt mech d'Verbindung nääscht, da maachen ech d'Leit just rosen. A mir kréien duerch deen neie Fahrplang vill méi Stabilitéit. An et komme ganz grouss Neierungen, déi wäerte vill Verbesserungen mat sech bréngen; do wäerte mer nach zum gegebenen Zäitpunkt hei genuch ze diskutéieren hunn.

Ech hunn och mat de betrouffene Gemengen diskutéiert an hinnen eng ganz Rei Saache proposéiert. Zum Beispill der Gemeng Diddeleng hunn ech eng Propos gemaach - déi gëtt och ëmgesat am September -, datt mer eng nei Buslinn oder eng Buslinn, déi besteet, déi haut just op Beetebuerg geet, verlängeren, an datt

mer am Fong all d'Aktivitéitszonen, déi tëschent Beetebuerg an Diddeleng leien, mat enger Buslinn verbannen.

Dat war e grouse Schwaachpunkt bis elo, deen zu vill Verkéier gefouert huet. An da kënnen d'Leit sech decidéieren, zum Beispill mam Zuch op Beetebuerg ze kommen an do de Bus ze huelen an déi Aktivitéitszon, wou se hir Aarbechtsplazen hunn, wat menger Meenung no vill Verkéier wäert ewechhuelen aus den Uertschaften Diddeleng a Beetebuerg. An déi kritt och e ganz gudden Takt, déi Linn. Dat ass och nach eng zousätzlech Méiglechkeet - well et kënn een och nach weider an d'Stad - fir d'Diddelenger Leit aus alle méigleche Quartieren, fir an d'Stad ze kommen.

Déi zweet Saach ass, ech hunn der Gemeng Diddeleng gesot, an der Iwwergangszäit géife mer eng Expressbuslinn aféieren, esou wéi mer eng hunn tëschent Réimech an der Stad Lëtzebuerg de Moment, an déi Expressbuslinn hält just op e puer Plazen am Zentrum vun Diddeleng a firt da riichtduerch op de Kierchbiere bei de Pôle d'échange vum Tram, dee jo och am Dezember opgeet. An dee geet souguer net nëmmen, wéi et ausgesäit, bis bei de Rond-point, also bis bei d'Gare Pafendall, mä bis op de Glacis, soudatt ee vun do och an den Zentrum eng bequem Verbindung huet.

An ech si souguer bal iwwerzeegt, haupsächlech fir Leit, déi am Dag fueren, zum Beispill eeler Leit, ass dat méi bequem, dee Bus ze huelen op de Kierchbiere, wa se an d'Stad wëlle goen, wéi haut den Zuch. Well wann Der haut mam Zuch kommt, och mat enger Direktlinn, da musst Der op d'Gare fueren an da musst Der mam Bus vun der Gare zum Beispill nach op de Kierchbiere fueren oder an den Zentrum. An esou wéi d'Busstauen an der Stad de Moment sinn - ech hu jo den „temps réel“ entre-temps bei de Bussen, duerfir weess ech dat -, braucht Der duerfir heiansdo eng Stonn, bis iwwer eng Stonn, wat verréckt ass. Dir braucht méi laang Zäit vun der Gare op de Kierchbiere mam Bus wéi vun Diddeleng an d'Stad mam Zuch.

Fir d'Gare Beetebuerg, et ass scho gesot ginn, datt hunn ech och de Gemenge versprach, datt mer déi baulech Mesuren, Quaien a Sous-terrains, wäerte virzéien an datt mer dat relativ séier wëlle maachen, fir datt d'Ëmsteige méi bequem ass. An ech wëll lech awer och soen, datt et och vill Leit gëtt, déi dat haut scho maachen. Et gëtt zum Beispill en Zuch um Véierel op siwe vun Diddeleng op Beetebuerg, wou Leit weiderfueren an d'Stad; do sinn der méi dra wéi am Zuch um hallwer aacht oder eppes op hallwer aacht, deen haut direkt geet. Also et ass net esou, datt dat net genotzt gëtt.

Natierlech, ech verstinn dat, d'Zil soll sécher sinn, eischer déi Direktverbindung ze hunn. An dat ass och d'Zil, an dat hunn ech och der Gemeng Diddeleng gesot: „Wann déi Beeteburger Streck fäerdeg ass, hu mer d'Zil, fir vu Volmerange iwwer Diddeleng en 30-Minuten-Takt anzeféieren, direkt an d'Stad.“ Mä dat kënnen mer awer natierlech eréischt maachen, wa mer déi Capaciteite geschafen hunn, déi mer brauchen.

Här President, ech hunn och hei e ganze Koup Grafiken.

(**M. François Bausch montre une documentation à l'audience.**)

Ech wär frou, wann d'Deputéierten déi alleguerte krite. Do ass dee ganze Resumé dran, sougutt wat mä Virgänger gemaach huet vun Zich, déi bäigesat goufen, wéi och, wat ënner menger Period gemaach ginn ass. Do si vill Zich bäigesat ginn a Material kaaft ginn, mä leider effektiv ass den Netzausbau net séier genuch gaangen.

An ech hunn och en Tableau derbäigemaach, do gesäit ee schéin iwwert déi lescht 20 Joer, wivill investéiert ginn ass. Also an där Period, wou ech elo d'Responsabilitéit hunn, 2013, wann ech da bis 2023 huele vun dem Investissement pluriannuel, do steet: 3,8 Milliarden. Mä virdru waren et och nach eng Kéier 1,3 Milliarden. Dat heescht, mir hunn iwwer en Zäitraum vun 20 Joer an d'Eisebunn fënnf, jo iwwer fënnf Milliarden investéiert!

Ech deféiere jiddwereen, och lech, Här Wagner: Kuckt iergendwou an Europa, ob Dir, proportional gesinn, ee Land fannt, wat esou vill an d'Schinn investéiert wéi Lëtzebuerg! Et gëtt keent!

An duerfir gëtt et och kee Land, wat esou eng Croissance huet wéi mir zu Lëtzebuerg. Mir hu während 25 Joer, bis 2010, null Croissance gehat bei den CFL, an ab 2010 hu mer 60% Croissance vun de Reesender gehat. Och dat ass e Rekord an Europa, do kënn Dir gär vergläichen. Mä, wéi gesot, déi Gespréicher lafen. Vill Mesurë si getraff, et wäerten der nach getraff ginn. Et ass just eng Transitionsphas. An duerno wäert et vill besser goen, da wäert d'Offer fir jiddwereen vill besser ginn, wéi se haut ass.

An, Här President, ech géif lech heimadder déi Tableauen iwwerreechen.

(**M. François Bausch dépose une documentation sur le bureau de la présidence.**)

Ech wär frou, wann och d'Press se kéint kréien. Da ka jiddwereen sech dat eng Kéier ukucken.

Merci.

► **Plusieurs voix.** - Très bien!

► **M. Mars Di Bartolomeo, Président.** - Merci och.

A mer géifen dann zur Ofstëmmung iwwert d'Motioun iwwergoen.

Vote sur la motion

D'Ofstëmmung fänkt un. Fir d'Éischt déi perséinlech Stëmmen. Dann d'Procuratiounen.

An d'Ofstëmmung ass eriwwer: 5-mol Jo, 54-mol Neen. Domat ass d'Motioun ofgeleent. Merci.

Ont voté oui: MM. Gast Gibéryen, Fernand Kartheiser et Roy Reding (par M. Fernand Kartheiser);

MM. Marc Baum et David Wagner.

Ont voté non: Mmes Diane Adehm, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf, Mmes Martine Hansen, Françoise Hetto-Gaasch, MM. Aly Kaes (par M. Claude Wiseler), Marc Lies, Mme Martine Mergen, M. Paul-Henri Meyers, Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz, Serge Wilmes, Claude Wiseler, Michel Wolter (par M. Félix Eischen) et Laurent Zeimet;

MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol (par M. Roger Negri), MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Marco Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer (par M. Max Hahn);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter et M. Roberto Traversini.

A mir géifen dann zum nächste Punkt vum Ordre du jour iwwergoen: d'Reform vum Enseignement secondaire. An den Här Rapporteur, den honorablen Här Claude Lamberty, steet prett. Här Lamberty, Dir hutt d'Wuert.

6. 7074 - Projet de loi portant sur l'enseignement secondaire et modifiant

1. la loi modifiée du 25 juin 2004 portant organisation des lycées et lycées techniques;

2. la loi modifiée du 4 septembre 1990 portant réforme de l'enseignement secondaire technique et de la formation professionnelle continue;

3 la loi modifiée du 10 mai 1968 portant réforme de l'enseignement (Titre VI: de l'enseignement secondaire);

4. la loi modifiée du 14 mars 1973 portant création d'instituts et de services d'éducation différenciée;

5. la loi modifiée du 10 juin 1980 portant planification des besoins en personnel enseignant de l'enseignement postprimaire;

6. la loi modifiée du 29 juin 2005 fixant les cadres du personnel des établissements d'enseignement secondaire et secondaire technique;

7. la loi modifiée du 25 juillet 2005 portant création d'un lycée pilote;

8. la loi modifiée du 13 juillet 2006 portant réorganisation du centre de psychologie et d'orientation scolaires (CPOS);

9. la loi du 16 mars 2007 portant - 1. organisation des cours de formation professionnelle au Centre national de formation professionnelle continue - 2. création d'une aide à la formation, d'une prime de forma-



tion et d'une indemnité de formation;

10. la loi modifiée du 19 décembre 2008 portant réforme de la formation professionnelle;

11. la loi du 6 février 2009 relative à l'obligation scolaire;

12. la loi modifiée du 6 février 2009 portant organisation de l'enseignement fondamental;

13. la loi modifiée du 12 mai 2009 portant création d'une École de la 2^e Chance;

14. la loi modifiée du 29 juin 2010 portant création d'une réserve nationale de chargés d'enseignement pour les lycées et les lycées techniques;

15. la loi modifiée du 15 juillet 2011 visant l'accès aux qualifications scolaires et professionnelles des élèves à besoins éducatifs particuliers;

16. la loi du 30 juillet 2015 portant création d'un Institut de formation de l'éducation nationale;

17. la loi du 24 août 2016 portant introduction du cours commun «vie et société» dans l'enseignement secondaire et secondaire technique;

18. la loi du xxx ayant pour objet l'organisation de la Maison de l'orientation

Rapport de la Commission de l'Éducation nationale, de l'Enfance et de la Jeunesse

► **M. Claude Lamberty (DP)**, rapporteur. Merci, Hâr President. Hâr President, lëif Kollegeinnen a Kollegen, et gëtt kaum Plazen an eimem Land, wou esou ënnerschiddlech Talenter, Interessen, Potenzial a Perspektiven openeentreffen ewei an eise Lycéeën. Eis Klässesäll spigelen d'Villfältgkeet vun eiser Gesellschaft erëm. Eng Gesellschaft, an där jiddwer eenzelne Schüler d'Méiglechkeet soll kréien, säin eegene Wee ze fannen an och ze goen.

A genee dat soll mat dëser Reform passéieren: no Méiglechkeet all Schüler d'Chance ginn, fir seng Perspektiv kënnen ze verwierklechen. Chancëgläichheete schafen ass nieft der Wëssensvermittlung eng vun deenen zentralen Aufgabe vun der ëffentlecher Schoul. Eege Weeër goen, souwuel als Schoul, als Gebai, wéi och als Schüler, ass eng vun de Grondiddie bei dëser Modernisatioun vun eiser Lycéeslandschaft. Dëst féiert zu dättelech méi Chancëgläichheet an eise Schoule fir déi jonk Generatioun.

De Modell vu fréier ass haut net méi akzeptabel, well d'Welt vun haut ass eng aner wéi virun 10, 20 oder 30 Joer, dat souwuel, wat d'Schoulpopulatioun an d'Heterogenitéit vun de Klasseverbänn ubelaangt, wéi och, wat d'Erausforderungen an, an och baussent, de Schoulen ubelaangt.

Fréier war d'Schoulpolitik quasi eng Schoul-schabloun, déi vum Ministère iwwert d'Land gestülpt gouf a wou all Schüler huet missen dra passen. Hues de als Schüler net an dat Schema gepasst, dann has de e Problem; hues de gutt dragepasst, dann ass alles sai Wee gelaf.

De Modell vun där enger Schoul steet dem Dynamismus an dem Innovationsgescheh vum eise Schoule vun haut am Wee a kënnt den Erausforderunge vum 21. Jorhonnert och einfach net méi no. Ech erlabe mer an deem Kontext drop ze verweisen, dass déi legal Basis vun eise Lycéeën zu engem ganz groussen Deel aus dem Joer 1968 staamt, eng Zäit, an där vum éischte Mann um Mound geschwat a gedreemt ginn ass, während mer haut vum éischte Mann um Mars schwätzen an dreemen.

Mir brauche Schoulen, déi sech kënnen fräi entfalten, déi an hiren innovative Projeten ënnerstëtzt ginn an net ausgebremst ginn. Mir brauche Schoulen, déi eege Konzepter ausschaffen, fir déi villfältg Talenter vun hire Schüler geziilt kënnen ze fërderen. Mir brauchen ënnerschiddlech Schoulen, déi de Schüler ënnerschiddlech Weeër zu hirem Zil opweisen. Mir brauche Schoulen, déi et duerch déi geziilten Talentfërderung de jonke Leit erméiglecht, eise Schoulsystem mat enger ofgeschlossener Qualifikatioun ze verloossen. Et sinn déi jonk Generatiounen, déi gestärkt aus eise Schoulsystem erauskomme mussen, fir hir eegen Zukunft, mä och fir d'Zukunft vun eise Land. An anere Wieder, Hâr President: Mir brauchen ënnerschiddlech Schoule fir ënnerschiddlech Schüler.

ler ech op d'Kärpunkte vun der Modernisatioun ze schwätze kommen, hei nach e puer Wuert zum Historique. Déi viereg Regierung hat am Mee 2013 nach e Gesetzestext deposéiert, deen den Enseignement secondaire reforméiere sollt. Dat hat deemools allerdéngs fir e bëssen Opreegung gesuergt. An och de Statsrot hat mat ronn 40 Oppositions formelles sai Wiertche matgeschwat. Et sief gesot, dass d'Oppositions formelles vun deemools haapt-sächlech op e Paradigmewissel an der Interpretatioun vum Artikel 32 vun der Verfassung zréckzeféiere waren.

Esou wéi de Koalitionsaccord vun dëser Regierung et virgesäit, fousst d'Modernisatioun vum Lycée op deem ale Projet de loi. D'Punkten, déi vum ale Projet de loi iwwerholl goufen, sinn zum Beispill d'Klassen, déi ëmgedeelt ginn, d'Schafe vun der Commission d'inclusion scolaire, de Conseil de classe restreint an d'Stärkung vun der Representatioun tëschent Direktioun, Schüler an Elteren.

De Projet de loi, dee mir elo hei virun eis leien hunn, geet a Punkte manner wäit wéi de Projet de loi vun 2013. E setzt doriwwer eraus awer ganz nei Akzenter. E geet och heiansdo méi wäit, mä ganz besonnesch dréit e geziilt u Schrauben, déi eis gutt Schoulen ab Septem-ber nach besser maachen, an dat fir all d'Schüler. Fir et kloer ze soen: Mat dëser Reform gëtt näischt ofgeschafft, wat haut gutt funktionnéiert! Et ass éischer esou, dass d'Offer méi grouss gëtt, wat opgrond vun der Villfältgkeet vun eiser Schoulpopulatioun och absolut néideg ass.

Eng vun den Hauptprioritéiten ass déi pädagogesch Autonomie, déi elo gestärkt gëtt. D'Lycéeën sollen an Zukunft selwer hir Konzepter ausschaffen, déi un hir spezifesch Schoulpopulatioun ugepasst sinn. D'Schüler solle sech also an Zukunft net méi un d'Schoulen upassen, mä d'Schoule sollen den Interessen an Talenter vun de Schüler an awer och de regionale Berufsdebouchéé Rechnung droen an deementsprechend agéieren.

D'Ziler, wat déi national Schoulpolitik ugeet, gi ganz kloer vum Ministère définéiert a ginn an engem nationale Referenzkader festgehalten. D'Schoul entscheet da selwer, mat wéi enge Moyenen, Offeren a Konzepter een dës Ziler wëllt erreechen. Déi eenzel Demarché ginn am PDS, also am Plan de développement de l'établissement scolaire dokumentéiert a gëlle fir jeeeweils dräi Joer. No dësen dräi Joer fënnst eng Evaluatioun statt an et gëtt gekuckt, wat gutt funktionnéiert huet an op wéi engem Punkt eventuell och Adaptatiounen néideg sinn.

Wat d'Ausschaffe vun deem Plan de développement de l'établissement scolaire ugeet, fannen ech et ganz wichteg ze betounen, dass, äänlech wéi dat am Fondamental ass, vun ennen erop geschafft gëtt an net vun uewen erof diktéiert gëtt. De PDS kënnt näamlech zustanen nodeems d'Besoin vum der jeeeweileger Schoulpopulatioun analyséiert goufen an nodeems déi existéierend Offre scolaire a parascolaire gekuckt gouf. An all Lycée ass eng Cellule de développement scolaire chargéiert, de PDS zesumme mam Conseil d'éducation auszuschaffen. Et sinn also all d'Akteuren aus der Schoul do vertruuden: d'Schüler, d'Enseignanten, d'Elteren.

De PDS gëtt dann der Lycéeskonferenz virgestallt a vum Direkter approuvéiert. Mat dëser Approche kréien d'Lycéeën also op där enger Säit eng méi grouss Marge de manœuvre, ma ginn op där anerer Säit gläichermoossen och responsabiliséiert. Responsabiliséiert, fir d'Schouloffer weider ze diversifiéieren a fir a verschiddene wichtige Beräicher, wéi zum Beispill der Inklusioun vu Schüler mat spezifesch Besoinen oder dem Abanne vun de Schüler, Eforten ze maachen.

Hâr President, ech kommen zu engem weidere Kärpunkt vun dësem Projet de loi an zwar deene méi flexibel Sektionen am Secondaire classique respektiv deene méi differenzierten Niveauen am Secondaire technique oder, wéi eno no der Reform wäert heeschen, am Secondaire général.

De System vun de Sektionen am Classique wäert deene meeschten heibanne bekannt sinn. Ausser, dass déi al A2 an eng G ëmgedeelt gouf, huet sech zënter 1968 net ganz vill bei de Sektione gedomt. Ab der Rentrée kënnt elo net nëmme eng nei Sektion derbäi, mä si kënnen zudeem och nach méi flexibel a jee no Besoin ausgerichtet ginn.

Fir eng gewësse Kohärenz bei de Premièresklassen ze behalen a verschidde Kombinatiounen ze erméiglechen, ginn déi eenzel Fächer a véier Voleten ageedeelt. An zwar: e Volet «langues et mathématiques», e Volet «spécialisation», e Volet «formation générale» an e Volet «optionnel». Soumat gëtt déi schoulesch Offer iwwert d'Land weider diversifiéiert an d'Lycéeën kënnen eege pädagogesch Profiler ausschaffen, déi den ëmmer méi spezifesch Studien- a Berufsbiller Rechnung droen.

Och am Secondaire général, also am geschwënn alen Technique, deet sech mat dëser Reform esou munches. Hei gëtt verstärkt Wäert geluecht op differenziéiert Schaffen, fir besser op déi eenzel Stärkten a Schwächte vun den eenzelne Schüler kënnen ze reagéieren an anzegoen.

Of ass et näamlech esou, dass e Schüler am haitegen Technique duerch eng Schwächt an engem Fach, huele mer zum Beispill Mathé, keen Zougang huet zu engem méi héijen Niveau an engem anere Fach, wéi zum Beispill Franséisch. De Schüler ka sech also am Franséischen net wierklech weiterentwéckelen, aus deem eenzege Grond, well e Schwierigkeeten an der Mathé huet. Fir dat an Zukunft ze vermeiden, gi sougenannt «Cours de base» an «Cours avancés» op den ënneschte Klassen am Général agefouert. Dat gëllt op der neier Si- xième - där aler Huitième -, wou esou Coursen am Däitschen, Franséischen a Mathé ugebuede ginn. An op Cinquième - där aler Neuvième - kënnt dann och nach Englesch derbäi.

Et gëllt also, an Zukunft méi op d'Stärkte vun den eenzelne Schüler ze kucken, amplatz se wéinst de verschiddene Schwächten op der ganzer Linn ze bestrofen. Eng differenziéiert Approche ass, wéi gesot, hei d'Zauberwuert.

Resüméiert kéint ee bei deem heite Punkt soen: Fir do, wou d'Schülerpopulatioun relativ heterogen ass, am Enseignement secondaire général also, mat ville verschiddenen Talenter an Erausforderungen op Säite vun de Schüler, fir do eng beschtméiglech Perspektiv fir déi Jonk ubidden ze kënnen, gëtt am Secondaire général alles vill méi flexibel. Et geet hei ëm eng individuell Profilstärkung vun deem jeeeweilege jonke Mënsch. Dem Schüler hëllefen, wou et néideg ass, an en do fërderen, wou e scho gutt ass: Dat ass de Wee, deen hei ageschloe gëtt, zum Wuel vum Jonken.

(Mme Simone Beissel prend la présidence.)

E Wuert och zur Orientatioun. All Lycée muss eng eege Cellule d'orientation hunn. Déi Cellule ass responsabel fir d'Démarches d'orientation, déi am PDS festgehele gi sinn. D'Iddi hannendrun ass, dass d'Schüler besser kënne begleet ginn an der Orientatioun, wéi dat bis elo de Fall war.

Op Septième a Huitième gëtt et en Avis provisoire. Enn der Huitième gëtt den Dialog mat den Eltere verdéift. An um Enn vun der Neuvième decidéiert dann de Conseil iwwert d'Fräigab fir d'Sektionen, déi duerno opginn. Et gëtt eng Orientatioun unhand vun de Resultater vum Schüler, mä natierlech och unhand vu sengem Profil, senger Entwécklung an unhand vun deem, wat op der jeeeweileger Sektion duerno gefrot ass.

Madamm Presidentin, eng weider Prioritéit vun dësem Projet de loi ass den Appui, also d'No- hëllef an d'Hëllef fir de Schüler. D'Schüler léieren näamlech net alleguerde gläich séier a verschiddener brauche verstärkt Hëllefstellung, fir zum Zil ze kommen. Duerch eng méi kohärent Approche vun de Lycéeën sollen d'Schüler besser betreit ginn a jiddwereen do ofgeholl ginn, wou e grad steet.

Net nëmme, dass dëst ee vun deene siwe wichtige Kärdomäner ass, fir d'Qualitéit vun der Schoul ze bewäerten, de Projet gesäit och Mesur vir, fir den Appui an den Encadrement vun de Schüler ze verbessern. Ech denken dobäi un d'Méiglechkeet vun obligatoreschen Ap- puieren oder un d'Méiglechkeet vun engem sou- genannte Parrainage tëschent engem Schüler aus enger ieweschter Klass an engem Schüler aus enger ënneschter Klass.

Net zulescht wäert och d'Commission d'in- clusion d'Prise en charge vu Schüler mat spezi- fesche Besoinen assuréieren an a bestëmmte Fäll en individualiséierte Formatiounsplan- ginn déi concernéiert Schüler proposéieren.

Dem Service psycho-social et d'accompagne- ment scolaires, SPAS genannt, fällt och an Zu- kunft eng immens wichteg Roll zou. De SPAS hëlleft Schüler, déi Problemer hunn dohem, psychologesch oder och schoulesch, mä hëlleft och den Enseignanten, déi déi Schüler an de Klassen hunn, mat de Besoins spécifiques.

Madamm Presidentin, lëif Kollegen a Kollee- ginnen, d'Schouloffer un d'21. Jorhonnert upassen, heescht och, op Beräicher setzen, déi vläicht keng laang Tradition hunn, mä dofir eng grouss Zukunft. Eppes ass gewëss: Den di- gitale Beräich huet net nëmme Zukunft, en ass d'Zukunft!

Déi Jonk solle fréi d'Méiglechkeet kréien, sech un d'Welt vum Numérique erunzetaaschten. Hei entstinn d'Aarbechtsplaze vun haut a vu muer. Dat geschitt am Lycée, ënner anerem mat deene versprachene Tabletten, déi ee kann zu besonnesche Konditiounen kréien, fir se am Schoulalldag dann och ze benotzen. Den iPad ass hei keen „nice to have“, mä de Schoul- sak vu muer. Mä dat geschitt virun allem awer och mat der Aféierung vun enger neier Sek-

tioun, d'Sektion I, «informatique-communication».

Den Akzent gëtt kloer op dee ganze Sektour vum TIC, dat sinn d'Technologies de l'informa- tion et de la communication, geluecht, dat heescht, op alles, wat mat Programmation, Bases de données, Informatik, Physik a Mathé ze dinn huet. Ab der Rentrée gëtt dës Sektion, déi sougenannten „e-Skills“ fërdert, an de Fu- ture Hubs am LTE zu Esch an am Lycée des Arts et Métiers an der Stad ugebueden. Am Norde soll de Lycée zu Clief nozéien, soubal d'Diere fir déi iwwernächst Rentrée opginn.

Ech hunn am Ufank vu menger Ried vun Zu- kunftschancen a Perspektive geschwat. Wa mer eise Jonken dës wëlle bidden, da musse mer eis schoulesch Offer och deementsprechend upa- sen. A Beruffer, an deenen nei Informatiouns- a Kommunikationtechnologien dra sinn, dat sinn nun emol Zukunftsberuffer.

E weidere Schwéierpunkt an dësem Projet de loi läit ganz kloer an der neier Participa- tiounskultur/-struktur. D'Lycéeën sollen den Echange tëschent Elteren an de Schüler fërde- ren. Dat geschitt engersäits duerch Demar- chen, déi am PDS opgeléicht sinn, anersäits sollen duerch d'Conférence nationale des élèves déi néideg Ressourcen zur Säit gestallt ginn, fir autonom an onofhängeg kënnen ze schaffen.

D'Schüler sinn déi éischt Betreffen an domat am beschl. Platzéiert, fir iwwer hir Schoulen ze schwätze respektiv Verbesserung virzeschloen. An och d'Eltere sollen an Zukunft méi mat age- bonne ginn. De Projet de loi iwwert d'Schafe vun enger nationaler Elterevertiedung ass de Moment jo nach um Instanzewee.

Madamm Presidentin, Dir Dammen an Hären, ech hoffen, ech konnt lech a menger kuerzer Zäit en Abléck an dës Modernisatioun vum Ly- cée verschafen. Ech denken, et ass e groussen a wichtige Projet, deen eis Schoullandschaft mo- derniséiert an no vir bréngt an deen eise Schüler am Land zeguttkënn. Am Vierder- grond steet, wéi gesot, déi vergréissert Autono- mie, déi eis Schoullandschaft wäert diversifiéie- ren, se un d'21. Jorhonnert upasst an aus eise gudder Schoule besser Schoule fir jiddweree wäert maachen.

Wéi gewinnt, fannt Der den Detail vun allen Adaptatioun grad wéi och déi eenzel Avis vu Statsrot a Berufschamberen a mengem schréftleche Rapport.

Zum Schluss wëll ech awer nach e puer Mercie lassginn. Merci de Kollegeinnen a Kollegen aus der Educationskommission fir hir kon- struktiv an zum Deel och kritisches Mataarbecht. Merci besonnesch och dem Joëlle Merges, der Kommissionssekretärin, fir d'Ennerstëtzung beim Rapport. Merci dem Minister Claude Meisch a senger Beamten, déi ëmmer en oppent Quer bei Froen haten. A schlussendlech Merci lech alleguerde fir d'Nolauschteren.

► **Plusieurs voix.** - Très bien!

► **Mme Simone Beissel**, *Présidente de séance.* - Merci dem Rapporteur Claude Lam- berty. Als éischt ageschriwwen Riednerin hunn ech d'Madamm Martine Hansen. Madamm Hansen, Dir hutt d'Wuert.

Discussion générale

► **Mme Martine Hansen (CSV).** - Merci, Ma- damm Presidentin. Dir Dammen an Dir Hären, d'Madamm Delvaux hat beim Projet de loi 6573 iwwert d'Reform vum Secondaire breet Consultatiounen gefouert.

An ier ech elo virfueren, wëll ech awer fir d'Éischt nach dem Rapporteur, dem Hâr Lam- berty, Merci soen, well soss hunn ech dat herno vergiess. Also, villmools Merci!

(Hilarité)

Sou! D'Madamm Delvaux hat och ganz vill Avis gefrot. All Lycée war zum Beispill opge- fuerdert ginn, fir een Avis ofzeginn. Et ass na- tierlech dunn och ganz vill kontrovers disku- téiert ginn - ech ka mech nach ganz gutt dorun erënneren -, an dat och, well d'Reform eng Partie grondleeënd Annerunge mat sech bruecht hat. Ech gi just e puer Beispiller.

De Sproochenunterricht am Secondaire gé- néral sollt méi flexibiliséiert ginn. Am Général wä- ren d'Sektionen u sech nei définéiert ginn. Am Général an am Classique wär op Deuxième en Travail personnel encadré agefouert ginn. Dat ware ganz vill Diskussiounen ginn. Do wär et ëm eng Aarbecht gaangen, wou emol eng Kéier net nëmme Wëssen an de Kapp u sech eragestoppt gi wär, mä wou definitiv kompeten- zorientéiert hätt misse geschaff ginn, ge- plangt ginn, Informatiounen siche goen, Outils siche goen, réalisieren, evaluieren an esou weider. D'Schoulentwécklung wär méi ko- härent définéiert ginn an esou weider. Et war liichte Sprengstoff dran.

D'Madamm Delvaux hat och net deen einfache Wee gesicht, mä si war sech bewosst - ech ginn



emol zumindest dovunner aus, mä vläicht kënnen d'LSAP-Kollege mer dat nach bestätegen -, datt et wichteg wär, bei esou enger déif gräifender Reform mat den Akteure vum Terrain ze diskutéieren, si mat an d'Boot ze huelen.

Iwwert dëse Projet de loi 7074 vum Här Meisch ass, au contraire, net vill diskutéiert ginn. Et ass u sech schonns e bësse komesch, et ass verdammst roueg a mir schwätzen awer iwwer eng Lycéesreform. Firwat? Do gëtt et a mengen Aen e puer Ursachen.

Eng éischt: Am Verglach zur geplangter Reform Delvaux ass dat heiten - ech iwwerhuelen dem Här Meisch seng Wieder - sécherlech „keng Makroreform“, esou wéi hien dat d'lescht Joer op dëser Plaz u sech fir d'Berufsausbildung annoncéiert hat, mä et ass éischter „eng Mikroreform“.

A wann d'Madamm Delvaux hei ënner anerem nach all Schoul opgefuerdert hat, een Avis ofzeginn, esou si bei dësem Projet de loi emol net d'Direkteren als Collège des directeurs gefrot ginn, fir een Avis ofzeginn. Ass dat normal? Neen! Et ass u sech katastrophal. Esou eng Reforme muss mat de Leit vum Terrain gemaach ginn, Stéchwuert: Participatioun. An d'FEDUSE huet dee Mangel u Kommunikatioun de Moie jo nach eng Kéier bekräftegt.

An drëttens: Hei huet de Courage gefeelt, fir de Sproochenunterrecht unzepaken. Dat ass schued. Et ass eng verpasste Chance, awer wahrscheinlech och ee Grond, firwat net vill kontrovers iwwert dëse Projet de loi diskutéiert ginn ass.

Allgemeng: Als CSV hate mer zwielef Amendementer gemaach. Zweek sinn der ugeholl ginn. Ech géif bal mengen, déi hätte missen ugeholl ginn, well soss wäeren - ënner Gänsefäisschen - „Feeler“ am Gesetz gewiescht. Déi aner zéng si refuséiert ginn. Ech wäert nach op eenzelnen agoen.

A just eng kleng Klammer: Den Här Minister hat et net fir absolutt noutwendeg fonnt, fir an d'Kommissioun ze kommen, wéi mer d'Amendementer virgestallt hunn. Dat seet och schonns eppes aus, wéi erwünschenswäert konstruktiv Oppositionsaarbecht ass.

► **Une voix.** - Très bien!

► **Mme Martine Hansen (CSV).** - Wat ännert dann elo mat dësem Gesetz?

De Rapporteur ass definitiv am Detail op déi meeschte Punkten agang. Ech gi just op sechs Punkten an: éischtens, den Opbau vum Enseignement secondaire, déi nei Etiketten; zweetens, d'Participatioun, d'Matsproocherecht, d'Schoulentwécklung; drëttens, d'Classes inférieures; véiertens, d'Classes supérieures an déi domadder verbonnen Autonomie; fënneftens, de Sproochenunterrecht; a sechstens ginn ech awer och nach op de Premièresexamen an.

Sou! Ech fänke beim Opbau vum Enseignement secondaire un, déi nei Etiketten. Den Här Lamberty huet gesot: „eng Ëmdeefung“. De Secondaire classique bleift de Classique. Den Technique gëtt elo de Général. D'Berufsausbildung bleift d'Berufsausbildung, mä déi gëtt aus dem Général erausgeholl.

Ech weess, datt do heroesch Diskussiounen gefouert gi sinn, well am Ufank sollt u sech de Classique de Général ginn, wat vläicht och e bësse méi logesch gewiescht wär. Mä de Classique wollt awer de Classique bleiwen. Dunn huet den Technique gesot: „Ma wann Dir wëllt de Classique bleiwen, da gi mir de Moderne.“ An dat ass awer och näischt ginn. Dunn ass den Technique dann eben de Général ginn.

D'Etikett ännert also. Dat wäert awer kee groussen Afloss op d'Schoul, d'Schoulhalen, d'schoulesch Resultater um Terrain hunn. A fir méi Kloerheet suergt dësen Etikettewissel sécherlech net. Ech hat den Enseignement général gegoogelt. Da fënnt een: «(...) est le parcours le plus classique, amenant les élèves vers les études supérieures.» Entsprécht dat eise Technique? Op jidde Fall misste mer de Google emol informéieren, datt hei zu Lëtzebuerg dann alles e bëssen anescht ass, well wann de Général den «parcours le plus classique» ass, dann hu mer een hei, deen nach plus que plus classique ass, nämlech eise Classique!

Wéi gesot: Et bréngt näischt! Et ass just eng Etikettenännerung, déi awer net onbedéngt fir méi Kloerheet suergt. Mä et mécht der Kaz kee Bockel.

Deen zweete Punkt: d'Participatioun, d'Matsproocherecht, d'Schoulentwécklung am Allgemengen. Dräi Begrëffer, déi fir d'Schoul wichteg sinn an déi am Prinzip eppes Positives bedeiten. Ech wëll hei fir d'Éischt betounen, datt d'Schoulentwécklung definitiv ganz wichteg ass, datt se awer nëmme mat de Leit vum Terrain an net iwwer hir Käpp ewech ka funktionéieren, datt eng participativ Leedung den A an O vum der Schoulentwécklung an och vun enger gudder Schoulleedung ass.

A gleeft mer et: Wann ee gären Neierungen an d'Schoul bréngt, dann ass et wichteg, d'Enseignanten, dat educatiivt Personal, déi ganz Schoulcommunautéit dovunner ze iwwerzeegen a si mat anzebannen! Wa si mat decidéieren, wa si derhannert stinn, wa si mat Verantwortung iwwerhuelen, da kënn een als Schoul weider. Dat geet awer nëmme, wann zumindest eng gewëssen Demokratie, ee gewëssent Matsproocherecht an der Schoul garantéiert ass.

Dat alles dierft ech u sech engem Politiker aus der Demokratescher Partei net musse soen, mä verschidden Annerungen an dësem Projet de loi ginn awer definitiv géint all demokratesch Versteedemede. Ech ginn lech zwee Beispiller.

De Proffecomité als Vertriebung vun den Enseignanten ass ofgeschaaft ginn. Deen ass ersat ginn duerch de Comité de la conférence du lycée, eng Vertriebung also vum gesamte Personal vun der Schoul. Dat ass prinzipiell net schlecht. Just eng kleng Klammer: Hei hätt een och kënnen d'Aufgaben e bëssen upassen, well do war just Copy-and-paste gemaach gi vum Comité des enseignants.

Dëse Comité de la conférence du lycée huet ënner anerem als Aufgab, d'Personal bei der Direktioun ze verrieden. Dat ass och gutt. Mä laut Gesetz kann d'Direktioun och Member vun dësem Comité sinn. Dat heescht, d'Direktioun ka mat dësem Gesetz als Member vum Comité Doleancé bei sech selwer virbréngen. Logesch fanne mir dat net. D'Majoritéitsparteien hunn awer eisen Amendement, wou mer virgeschloen haten, fir dat ze präziséieren, datt d'Direktioun net dierft Member vum Comité vun der Konferenz sinn, eestëmme ofgeleent. D'CSV wollt hei Klorheet. D'Majoritéit huet dës Klorheet eben ofgeleent, wou ech wierklech net verstinn, firwat, well den normale Mën-scheverstand seet engem jo awer, datt, wann esou ee Comité soll funktionéieren, dann d'Direktioun net kann dra sinn.

An dann, wat an eisen Ae vill méi schlëmm ass, dat ass de Fonctionnement vum Conseil d'éducation, esou wéi et hei am Projet de loi elo virgesinn ass. De Conseil d'éducation ass deen offizielle Gremium an der Schoul, wou Elteren dra sinn, wou Schüler dra sinn, wou Enseignanten dra sinn an d'Direktioun dran ass. Dëse Gremium hätt u sech iwwert d'Charte scolaire ze decidéieren, misst u sech déi autonome Aktiounen vun der Schoul guttheeschen, zum Beispill nei Schouloffer, misst u sech den Accord iwwert d'Verdeelung vum Budget ginn an esou weider.

Firwat soen ech „hätt“, „misst“, an net „mécht“ an „decidéiert“? Mä ganz einfach, dëse Gremium riskéiert, mam Här Meisch sengem Gesetz elo just nach Schäinaufgaben ze kréien. Well kennt Der de Sproch: Paragraf 1: De Chef huet ëmmer recht. Paragraf 2: Wann de Chef eng Kéier net recht huet, dann trëtt erëm Paragraf 1 a Kraaft. A genau esou riskéiert et elo beim Conseil d'éducation ofzelafen! An dat huet u sech kee gefrot. Wann den Direkter näamlech elo eng aner Meenung huet wéi d'Majoritéit vum Conseil d'éducation, dann decidéiert wien elo, nom Gesetz? Ma den Direkter!

Dat heescht, just den Direkter huet ze decidéieren. Déi aner riskéieren, zu Blummestäck ze mutéieren.

Dir Dammen an Dir Hären, dat ass dach absolutt demotivant fir jiddwereen, dee wëllt matschaffen! A mir brauche Leit, déi wëlle matschaffen a matdenken. Dat hei ass net gutt esou. Mat dësem Gesetz riskéieren déi Gremien, déi kéinten ebe matschwätzen a matdiskutéieren, zu engem Pro-forma-Gremium ze degradéieren. Als CSV si mer hei dergéint.

Mir haten och en deementspriedenden Amendement gemaach, mä Dir kënn lech et jo denken: D'Majoritéitspartei wäere sech eens, fir dëst natierlech net unzehuelen. A wat war d'Erklärung? D'Autonomie ass eng éischt. Dësen u sech positive Begrëff vun Autonomie gëtt hei komplett detournéiert an dat ass schlecht fir d'Schoulentwécklung.

Eng zweet Erklärung war: Et wär «dans l'intérêt du bon fonctionnement de l'établissement». Dir Dammen an Dir Hären, dëst ass genau de Contraire! Dëst ass kontraproduktiv fir ee gudder Fonctionnement vun der Schoul. Ech soen et nach eemol: Et ass komplett demotivéierend, wann een de Leit, déi solle matschaffen, matdiskutéieren, matdenken, vun Ufank u seet: „Dir kënn dat zwar maachen, mä wa mer eis net eens ginn, dann decidéiert awer den Direkter.“

An zweetens, gleeft mer et, wann den Direkter sech net eens gëtt mam Conseil d'éducation, wat bestëmmt net dacks virkënt, mä wann et virkënt, dann ass ee Problem do. An da muss derno gekuckt ginn an et dierft net einfach de Paragraf 2 vu mengem Sproch virdrun anrieden. Da muss een Drëtten ee Bléck drop werfen an tranchéieren. Do huet de Minister ganz einfach eng Verantwortung ze iwwerhuelen. Autonomie heescht net, datt de Ministère keng

Verantwortung méi soll oder dierft iwwerhuelen.

D'Majoritéitspartei wëllen op där enger Säit an der Grondschoul kee Supérieur hiérarchique an der Schoul, soss géif näischt méi funktionéieren. Se pochen do op déi an hiren Aen absolutt noutwendeg Basisdemokratie. An am Lycée poche se genau op de Contraire! Wou ass do d'Kohärenz? Wéi eng Logik stécht do derhannert?

Als CSV hu mer eng kohärent Vue. Mir si fir een Direkter mat klarem hiérarcheschem Pouvoir, net fir eng absolutt Basisdemokratie, souwuel an der Grondschoul wéi och am Lycée. Mir si fir een Direkter, deen awer mat de Leit schafft. Eng participativ Leedung vun enger Schoul ass wichteg a muss erméiglecht ginn a gefuerdert ginn.

Just nach eng kleng Remarque zum Schülercomité: Dëse kritt elo ee Sall an dat noutwendeg Material. Dat ass gutt esou. Mä duerch dës Bestëmmung vum Conseil d'éducation gi si an och d'Elterevertrieber mat dësem Gesetz, wat d'Matsproocherecht ugeet, sécherlech net gestärkt.

Dann, d'Schoulentwécklung mam Schoulentwécklungsplang, PDS, der Cellule de développement scolaire, der Charte scolaire mam Profil, Projet d'établissement, Projet d'innovation pédagogique an esou virun ass an dësem Gesetz alles aneschtens wéi kloer an iwwersiichtlech définiert a beschriwwen an och alles aneschtens wéi kohärent zur Grondschoul. Dat Ganzt ass kee Ganzt.

Esou sinn zum Beispill fir de PDS hei siwe Punkte virgeschriwwen, zum Beispill den Appui, d'Zesummenaarbecht mat den Elteren, d'Orientatioun, nei Technologien an esou weider, déi mussen dran enthalen sinn. Mä et gëtt zum Beispill weder d'Verbesserung vun der Unterrichtsqualität - den Enseignement ass awer den „core business“ vun de Schoulen an dat ass beim Grondschulgesetz esou beim PDS virgesinn - nach gëtt d'Wuelbefanne vun de Schüler, wat ee wichtige Facteur ass fir d'Réussite scolaire, hei behandelt. A wann déi Saache géife behandelt ginn, da wär et u sech eng Grundvoraussetzung, datt eng intern Evaluatioun och iwwert déi zwee Punkte gemaach gëtt. An dat wär immens wichteg, wann ech de Qualitéitskreeslaf vun enger Schoul, wann ech där... Wann ech eng Schoul gäre wëll verbessern, wär dat immens wichteg.

Mir haten als CSV hei e puer Amendementer proposéiert. Déi sinn alleguer - wéi kéint et anescht sinn? - refuséiert ginn.

Erlaabt mer just nach eng kleng Remarque zu de spezifesche Regeln d'ordre intérieur, déi an der Schoulcharta festgehalen ginn an déi méi wäit kënnen goe wéi dat, wat am Règlement grand-ducal iwwert d'Règles de conduite festgehalen ass. Als CSV si mer och hei der Meenung, an dat ass praktesche Grënn, datt de Ministère eng Verantwortung huet, fir sécherstellen, datt hei näischt festgehalen gëtt, wat onsinneg ass oder souguer géint verschidden aner Regele verstéist. Dir kënn elo soen: Dat do ass net esou wichteg. Mä et ass awer wichteg an der Praxis.

Ech ginn lech e Beispill: A menger fréierer Schoul hate mer zu där Zäit schon eng Charte scolaire, dat heescht, datt ass elo näischt extrem Neies. Do war an der Charte scolaire zesumme mat der Schoulcommunautéit festgehalen ginn an deene spezifesche Regeln, well mer geféierlech Beruffer ausüben, datt mer bei Verdachtsfäll kéinten Drogen- an Alkoholskontrolle maachen. An ech kann lech soen, déi Charte scolaire war vum Ministère approuvéiert ginn. An ech kann och soen, datt ech frou war, well ech ar tëschen duerch eng Kéier an d'Schoulkommissioun hei geruff ginn, well ech anscheinend an d'Fräiheet vun de Schüler géif agräfen. Ech mengen, dorop wëll ech net agoen. Mä dat géif awer eng Approbatioun vum Minister ginn, eng Ofsecherung vun der Schoul-direktioun, der Schoulcommunautéit bedeiten. D'Schoulen hu keng Juristen an et si keng Juristen. Natierlech bedeit dat awer och Matverantwortung vum Ministère, mä ech mengen, dat ass säin Job.

An op där anerer Säit géif dat awer och u sech eng Garantie bedeiten, datt d'Kierch am Duerf bleift. Dat ass vläicht elo e schlechten Ausdruck bei dëser Regierung. Loosse mer soen, fir datt alles an de Limitte bleift. An och do, mengen ech, huet de Minister eng Verantwortung. Och dat ass säin Job.

Dofir hate mer och per Amendement proposéiert, fir den Text esou bäizebehalen, wéi en am ale Gesetz war, nämlech datt dës Regele misste vum Minister approuvéiert ginn. Dat war vun der Majoritéit refuséiert ginn. Eng éischt Erklärung war, aus dem Bauch eraus, géif ech elo emol soen: „Da misst de Minister alleguer d'Regelen duerchkucken.“ Also, mir hu keng Honnerte vu Lycéë, an déi Regele ginn och net all Dag geännert. Dat ass ze packen!

Déi zweet Erklärung war d'Autonomie. Ech soen: D'Autonomie gëtt heiansdo méssbraucht, fir datt de Ministère manner Verantwortung muss iwwerhuelen.

Madamm Presidentin, Dir Dammen an Dir Hären, erlaabt mer, eng kleng Klammer hei opzemaachen. Mir haten nieft dësem Amendement nach e puer anerer gemaach, fir eng Partie praktesch Problemer um Terrain ze verhënnere respektiv fir juristesche Onsécherheeten aus dem Wee ze schafen. Zum Beispill wat d'Surveillance bei Deplacementen vun de Schüler innerhalb vun der Schoulzäit ugeet. Ech ginn hei net op den Detail an, mä ech wëll just soen, datt mir, d'Opposition, dës Amendementer net maachen, fir d'Majoritéit rosen ze maachen - heiansdo hunn ech dat Gefill, datt d'Majoritéit dat géif unhuelen -, mä mir maache se, well mer u sech konstruktiv gäre wëlle matschaffen a well mer gäre wëlle probéieren, déi praktesch Problemer u sech ze verhënnere. Well Onsécherheeten erschwéieren d'Aarbecht um Terrain onnëtz, an dofir kann ech u sech net verstoen, datt déi automatesch ëmmer refuséiert ginn.

Sou! Da kommen ech bei mäin drëtten Punkt: Classes inférieures. Hei ännert sech mat dësem Gesetz am Classique am Prinzip näischt. Am Secondaire général ginn elo, den Här Lamberty huet dat gesot, op de Sixième- a Cinquième-Klasse fir d'Sproochen a fir d'Mathé jeeeweils ee Cours de base an ee Cours renforcé organiséiert. Dat ass u sech näischt dramatesch Neies. Dat ass de PROCI-System. An ech si frou, datt de PROCI-System an deem Punkt elo verallgemengert gëtt. Dat ass an eisen Ae gutt esou. Ee Schüler soll net weinst enger Schwächt an engem Fach automatesch an alle Fächer mussen op ee méi niddregen Niveau wiesselen. Do, wou e staark ass, soll en op sengem méi héijen Niveau gefuerdert ginn, an do, wou e méi schwach ass, soll en op deem Niveau ënnerstëtzt ginn. Natierlech mam Zil, fir eventuell duerno och op dee méi héijen Niveau ze kommen.

Fir d'Orientatioun ze verbessern, gi Stages d'orientation agefouert. Och dat begrësse mer als CSV. Mä haalt wann ech gelift déi praktesch Emsetzung am A! Op jidde Fall muss verhënnert ginn, an ech weess, datt do ee Problem besteet, datt déi Schüler aus dem ländleche Raum, well manner Betriber do sinn, well den öffentlichen Transport net esou gutt organisiert ass, do ee Stage maachen, wou se grad hinkommen, an net onbedéngt do, wou se interesséiert wäeren, fir hinzugeen. Eng allgemeng Fro kéint een och stellen, ob Stagen net sënnavoll wäeren am Enseignement secondaire classique.

Da kommen ech bei d'Supérieursklassen. Do ännert sech am Enseignement secondaire général mat dësem Gesetz näischt. Am Classique kënn elo d'Sektioun Informatique-communication bäi. Dat begrësse mer als CSV. Mir sinn natierlech och frou, datt déi Sektioun op Clief kënn, soubal wéi de Lycée opgeet. Mä allgemeng muss een awer soen, datt d'Informatik als een Outil de travail iwwerall, allgemeng an der Schoul an an all Fach misst méi agesat ginn an u sech och net nëmme op deenen iPad-Klassen. Iwwerall gëtt dagdeeglech mam Computer, mam Internet geschafft, just net an all Schoul.

Eppes, wat mech drun erënnert, wéisou ech heiansdo drun zweifelen, datt mer am digitalen Zäitalter ukomm sinn, dat ass, wann ech d'Schüler gesinn, déi nach ëmmer mat deem uralen Klassebuch, wéi mir et schonn haten, do an der Hand ronderëmlafen, déi et dann um Enn vum Schouljoer vläicht och nach verschwannen dinn. Mir hunn digital Klassebicher. Mir sinn am digitalen Zäitalter. Firwat férdere mer dat net méi?

A wa mer een digitaalt Klassebuch hätten, dann hätte mer schonn en éischte Schratt an déi richteg Richtung gemaach, well dann hätte mer an all Klassenfall op d'mannst ee Computer stoen.

Sou! Déi klassesch Lycéë kënnen elo, fräi laut dem Här Meisch sengem Sproch: „Verschidde Schoule fir verschidde Schüler“, méi Autonomie, fir Optionsfächer unzébiden a fir d'Sektiounen méi flexibel ze organiséieren. Dëst ass net iwwert d'Gesetz, mä iwwer Règlement grand-ducal geregelt, mä ech wollt trotzdem kuerz heirop agoen.

D'CNEL an och d'FAPEL hunn an hirem Communiqué och op verschidde Problematiken higewisen. Fir d'Éischt wëll ech awer soen, datt viles vun deem, wat elo als nei an d'Fenster gesat gëtt, schonns besteet, nämlech de Projet d'innovation pédagogique, de Projet d'établissement, d'Margen, fir eng bestëmmte Stonnenzuel anescht ze organiséieren wéi den



üübliche Stonneplang, d'Charte scolaire, de Profill vum Lycée. Och déi zwou Saache stounge schonn am Gesetz vun 2004. De PDS, de CDS ass net komplett nei, stoung awer esou net am Gesetz. Et ass elo gutt, datt et an d'Gesetz kënnt. Et war awer schonn a verschiddene Schoulen. Dat, wat eben nei ass, sinn déi Optiounen, datt déi kënne méi flexibel organiséiert ginn.

Allgemeng soe mer als CSV: Méi Autonomie ass prinzipiell gutt, mä d'Qualitéit muss garantéiert ginn, de Wiessel tëschent de Schoule muss wederhi méiglech sinn, Chancëgerechtkeet muss gi sinn. Mir brauche vergläichbar Ugebueder iwwerall am Land. Mir mussen verënnere, datt d'Schüler, déi zum Beispill hei an der Stad wunnen, ee grouse Choix hunn tëschent deene verschiddene Kiischen um Kuch, déi ugebuede ginn, well se ebe vill Schoulen hunn, an déi um Land dat musse maachen, wat de Lycée eben decidéiert. Dat heescht, déi Kiisch huelen, déi grad do ass. Op jidde Fall mussen mer ee regionalen, lokalen an domadder och soziale Schoulclivage hei zu Lëtzebuerg verënnere.

Bei där méi flexibeler Organisatioun vun de Sektioneen hätt ee sech dofir och kënne d'Fro stellen: Firwat net dem Schüler an der eenzelner Schoul méi Choix loosse, anstatt datt d'Schoul de Choix hëlt? Et wär organiséierbar. Et wär natierlech e bësse méi Opwand.

D'Chancëgerechtkeet queesch duerch d'Land géif awer doduerch verbessert ginn. Wann ech d'Metapher vum Här Meisch geschéit huelen, hien huet eise Lëtzebuerger Schoul-system verglach mat engem Restaurant mat engem Menü. Ech mengen, et war e Schnitzel a Fritten.

Den Här Meisch wëllt elo gäre mat dësem Gesetz u sech vill verschidde Restaurante mat jeeweils engem anere Menü schafen. Mir hätten u sech léiw, wann d'Schüler an hirem Restaurant ënnerschiddlech Menüen ugebuede krite. Dat heescht, wou de Schüler de Choix hätt, ouni datt en direkt misst de Restaurant wiesselen, wann em eppes net schmaacht.

Allgemeng Autonomie däerf ni zu engem onkontrolléierbaren, oniwwersiichtleche Wirrwarr vu Lycéeë féieren, wou kee méi d'Iwwersiicht huet. Well wa kee méi d'Iwwersiicht huet, dann hu mer vläicht fir all Schüler säi Lycée, mä ech weess net, ob all Schüler säi Lycée fënnt. Also do muss dru geschafft ginn. Et muss am Sënn vun der Chancëgerechtkeet an der Qualitéitsgarantie koordinéiert an encadréiert ginn. An och do huet de Ministère eng Verantwortung.

Mäin zweetleschte Punkt: de Sproochenunterrecht. Ech hunn et schonns ufanks gesot, hei huet de Courage gefeelt. Dat wärend natierlech Diskussiounen ginn, mä dës Diskussiounen mussen gefouert ginn. Dës Projet de loi gesäit fir den Technique, de Général, deesewechten Niveau C1 vir fir Däitsch a Franséisch wéi fir de Classique, an am Englesche gesäit en am Général de B2 vir, am Classique de B2+. Mä Däitsch a Franséisch um Niveau C1, am Technique genauou wéi am Général (veuillez lire: am Classique).

Den SEW schreift a sengem Avis, dat wär zwar ganz luewenswäert, dat wär awer leider onrealistes. Do kënne mer als CSV dem SEW nëmmen recht ginn. Ee Gesetz soll sech awer realistesch Ziler setzen. Mir haten och am deem Sënn zwee Amendementer virgesinn, méi realistesch a méi flexibel fir de Schüler. Mir sinn nämlech der Meinung, datt mer net onbedéngt fir all Schüler seng Schoul musse schafen, mä datt eis ëffentlech Schoule méi e flexibel Ugebuet musse schafen, fir besser op déi ënnerschiddlech Fäegkeeten an déi ënnerschiddlech Uspréich vun de Schüler kënne anzegoen.

An an deem Sënn, wéi gesot, hate mer zwee Amendementer proposéiert. Mir hate proposéiert, fir déi dräi Sproochen, déi definitiv musse gemaach ginn - Däitsch, Franséisch an Englesch -, op zwee verschiddenen Niveauen unzibidden. Am Secondaire général, wou de Minister elo seet, Däitsch a Franséisch mussen um Niveau C1 sinn, d'selwecht wéi am Classique, géife mer proposéieren, eng Sprooch um C1 an de Choix de l'élève, awer mindestens eng Sprooch. Wann deen der gäre wëllt dräi maachen, da kann en der dräi maachen, mä e muss mindestens eng maachen. An am Classique hu mer proposéiert, datt e mindestens zwee Coursen um Niveau avancé muss huelen - hien huet awer de Choix - an deen anere Cours ass um Niveau B2+. Dat heescht, mir hunn un den Niveauen näischt geännert vis-à-vis vum Projet de loi vum Här Meisch.

Den Här Meisch sot elo de Moien - also mir hate schonns ee kleng Face-à-face de Moien -,

hie wär erféiert, esou eng Propos vun eis ze héieren. Ech wëll hei just nach eemol betounen: Eischten, mir géife beim Classique, genauou wéi den Här Meisch, zwou Sproochen um Niveau C1 aféieren. A souguer mindestens zwou. Dat heescht, de Schüler, wann e wëllt, kéint der och dräi um Niveau C1 hunn an eng Sprooch um Niveau B2+. Just bei eis hätt de Schüler eben de Choix. Dat heescht, hie kéint Däitsch a Franséisch um C1 maachen oder hie kéint Däitsch an Englesch um C1 maachen. Oder hie kéint och Franséisch an Englesch maachen. Oder eben, wéi gesot, déi dräi. Do wär also definitiv keen Nivellement vers le bas. Et wär just méi flexibel fir d'Schüler a besser un d'Heterogenitéit ugepasst.

Den Här Meisch sot als Erklärung och nach: „Mir brauche Leit, déi, wa se Redakter ginn, héich Carrière beim Stat maachen, Enseignants an esou weider, da mussen gutt am Däitschen an am Franséische sinn.“ Mä mat eisem Propos hu se jo nach all Méiglechkeeten. Een, dee wëllt Statsbeamte ginn, ma dee weess, datt e gutt muss Lëtzebuergesch, Däitsch a Franséisch kënne. Dee muss säi Choix upassen. Mä ech gi jo emol dovunner aus, datt eise Classique net nëmmen do ass, fir Statsbeamten auszebilden.

► **Plusieurs voix.** - Très bien!

► **Mme Martine Hansen (CSV).** - Et ginn och nach aner Beruffer a wichteg Beruffer, wou mer gutt ausgebildete Leit brauchen. Statsbeamte si wichteg, wéi gesot, awer eis Economie leeft net nëmme vun hinnen.

Da sot den Här Meisch och nach - an ech mengen, den Här Lamberty sot dat och -, e wëllt näischt änneren, wat gutt funktionéiert. Do soen ech: Et funktionéiert net gutt. Well eis ëffentlech Schoul hiert Ugebuet eben net flexibiliséiert, gëtt de Classique fir vill gutt Schüler zougemaach.

D'Amendementer sinn, dat brauch ech lech warscheinlech net ze soen, ouni vill Diskussiounen refuséiert gi mam Argument, doriwwer misst een diskutéieren. Et wär net esou einfach ze decidéieren. Et wär ee Paradigmewiessel. Dir Dammen an Dir Hären, wéini diskutéiert een dann iwwer de Sproochenunterrecht, wann net bei der Reform vum Lycéesgesetz? Als CSV bedauere mer, ech soen et nach eemol, datt de Sproochenunterrecht net ugepaakt ginn ass.

Ech bleiven da bei de Sproochen. Déi englesch Sprooch gewënnt lafend u Bedeutung. D'Regierung schéngt och där Meinung ze sinn, wann ech „Nation Branding“ héieren, wann ech „Let's make it happen“ héieren an esou weider. Englesch gëtt och um Aarbechtsmaart an op den Unien ëmmer méi wichteg an, dat ass ee grouse Virdeel, d'Schüler sinn un dëser Sprooch interesséiert. An dovunner misst een u sech profitéieren. Ech bedauern och, datt heiriwwer net diskutéiert ginn ass. An an deem Sënn deposéieren ech am Numm vun der CSV eng Motioun, wou mer d'Regierung opforderen, fir Englesch ab der Septième anzeféieren.

Motion 1

La Chambre des Députés,

- constatant que selon le rapport actuel de la Commission européenne concernant «L'apprentissage des langues étrangères par les enfants européens», l'anglais est la langue-étrangère la plus enseignée (97,3%) dans les pays de l'Union européenne au niveau de l'enseignement secondaire inférieur;

- notant que selon le même rapport, la proportion d'élèves qui apprennent l'anglais au niveau primaire a connu une tendance à la hausse la plus forte de 18,7 points depuis 2005, atteignant un total de 79,4% en 2014;

- considérant que selon les chiffres récents d'Eurostat concernant l'apprentissage des langues au Luxembourg, 100% des élèves apprennent l'allemand et le français tandis que 59,7% des élèves apprennent l'anglais à l'enseignement secondaire inférieur;

- notant que dans le régime de l'enseignement secondaire supérieur, 85,8% des élèves apprennent le français, 81,3% l'allemand et 70,9% l'anglais;

- sachant que l'anglais a acquis dans le monde d'aujourd'hui une importance cruciale en tant que langue de communication internationale;

- considérant que face à la globalisation, et alors que le monde universitaire est de plus en plus concurrentiel, l'anglais est devenu la langue des chercheurs;

- considérant dans ce même contexte et suite notamment à l'internationalisation des étudiants, que de plus en plus d'universités offrent sinon des cursus entiers en anglais du moins certaines formations supérieures spécifiques, de sorte que la langue de Shakespeare a sa place dans les milieux universitaires européens non anglophones;

- notant que les futures générations seront encore davantage habituées à travailler dans un contexte international;

- constatant en effet que pour de nombreuses entreprises l'anglais est devenu la langue de travail par excellence, de sorte que sa maîtrise peut s'avérer un critère de sélection déterminant,

invite le Gouvernement

- à introduire l'apprentissage de l'anglais dès les classes de 7^{ème} de l'enseignement secondaire classique et secondaire général.

(s.) Martine Hansen, Sylvie Andrich-Duval, Francoise Hetto-Gaasch, Martine Mergen, Laurent Zeimet.

Ofschléissend nach kuerz zum Examensreglement op Première. Manner Fächer am Secondaire classique ass am Prinzip gutt. Mä bleiwen d'Qualitéit an d'Gerechtkeet garantéiert respektiv wéi mécht een dat? Ginn Epreuve-communnen agefouert an deene Fächer, wou keen Examen ass, zum Beispill? Ginn et Double-correctionen, fir eben d'Vergleichbarkeet ze maachen? Et sinn nach vill Froen do.

Allgemeng muss een awer soen: Firwat ass dat esou kuerzfristeg annoncéiert ginn? Ech géif souguer soen: iwwer de Knéi gebrach ginn. Am Abrëll huet de Minister an enger Pressekonferenz ënner anerem annoncéiert, datt am Complement vum Diplom géifen d'Notte vun deene Branché vun Deuixième drastoe kommen, déi de Kandidat op Première net méi hätt. Et war dunn eng gewëssen Onrou do. Firwat erëm retroaktiv? Dat do ass net fir d'Eischt. D'Schüler, déi beträff sinn, wou d'Notte vun der Deuixième sollten op de Complement kommen, wousste bis zur Pressekonferenz nach net, datt dat awer esou wär. Du waren awer schonn zwee Trimesteren eriwuer.

Ech hunn dunn och eng Question parlementaire an deem Sënn gestallt an ech krut virgeschter eng Antwort. An an där Antwort dementéiert den Här Minister elo formell dës Informatiounen. Dat heescht, hien dementéiert formell seng Affirmatiounen aus senger Pressekonferenz, aus sengem Pressedossier. Hien dementéiert formell dat, wat am Projet vum Règlement grand-ducal steet, dee mir déi lescht Woch nach kritt hunn. Hien hätt sech et elo anescht iwwerluecht, nodeems e mat den Direkteren an der CNEL geschwat hätt. Mä do muss ee sech da froen: Firwat schwätzt een dann net am Virfeld mat de betraffene Leit? Stéchuert: Participatioun. An net emol fir d'Alleréischte eng Pressekonferenz maachen.

Déi Fro, déi awer nach ëmmer opbleift: De Minister hat jo awer erkläert, firwat dës Notte vun Deuixième wichteg wärend, nämlech „fir eng méi komplett Zertifizierung kënne ze kréien“. Dës Erklärung liicht mer och an. Dat géif dann awer elo fortalen. Firwat, wann et Virdeeler hätt, dann net einfach ee Joer waarden an d'Ännerung gemeinsam mam Général maachen? Heiansdo hunn ech d'Gefill, wéi wann den Technique, de Général vergiess gi wär bei deenen eischten Iwwerleeungen. Also firwat ginn esou Ännerungen net a Rou préparéiert?

Här President, Dir Dammen an Dir Hären, bei dësem Gesetz begrëisse mer eenzel Punkten, zum Beispill d'Neierungen am Cycle inférieur vum Enseignement secondaire général, d'Verallgemengierung vum PROCI-System an deem Punkt.

Mir bedauern awer, datt bei der Ausschaffung vun dësem Gesetz keng grondleeënd Diskussioun mat de Leit vum Terrain gefouert gi sinn, Stéchuert: Participatioun. Mir bedauern och, datt mat dësem Gesetz d'Participatioun an der Schoul, déi noutwendeg ass fir eng gutt Schoulentwécklung, d'Schoulleedung geschwächt gëtt. A mir bedauern, datt eenzel Punkten net praxisno am Gesetz behandelt ginn.

Et ass och extrem schued an och net ze verstoen, datt op ville Plazen de Courage gefeelt huet, wéi zum Beispill, fir de Sproochenunterrecht fundamental unzepaken. An dofir stëmme mer als CSV géint dës Projet de loi.

► **Plusieurs voix.** - Très bien!

► **Mme Simone Beissel, Présidente de séance.** - Merci, Madamm Hansen. Als nächsten ageschriwwene Riedner hunn ech den Här Lex Delles. Här Delles, Dir hutt d'Wuert.

► **M. Lex Delles (DP).** - Merci villmools. Madamm Presidentin, Dir Dammen an Dir Hären, loosst mech fir unzefänken dem Här Rapporteur villmools Merci soe fir säin exzellente schréftlechen an och mündleche Rapport.

D'Modernisatioun vum Lycée stellt d'Weichen, fir datt eis Schoulen am 21. Jorhonnert ukommen. Laang genuch hu mir schonn Zäit verluer, andeem mer versicht hunn, déi schoulesch Erausforderunge vu muer mat de Léisunge vu geschter ze léisen, andeem mer versicht hunn, d'Schüler op eis Vergaangenheet amplat op hir Zukunft virzebereeden. Mir

brauche vill méi eng modern Schouloffer, déi un d'Realitéteit vun eiser haiteger Gesellschaft ugepasst ass, déi differenziéiert ass an déi op d'Beruffer vu muer virbereet. Esou gesäit jiddefalls fir d'DP d'Schoulpolitik aus.

Wa mer virdrun héieren hunn, datt d'Kierch soll am Duerf bleiwen, datt sech Froen doriwwer gestallt gi sinn, wéi dat dann elo soll sinn: Majo dach, et soll esou sinn, a grad och bei de Riedner vun der CSV. Ech mengen, wann hei gesot gëtt, datt de Minister an enger Kommissioun net derbäi war, muss ech awer soen, fir dat awer der Fairness halber hei richtegstellen, datt de Minister - ech sinn eréischt säit véier Joer hei an dëser Chamber -, et muss een awer soen, datt de Minister a praktesch all Kommissioun do ass an datt de Minister, ob mir eng, zwou oder dräi Kommissiounen hunn, all Kéiers sech wierklech Zäit hëlt, aner Saachen, aner Obligatiounen, déi en huet, ofseet, fir kënne wierklech hei an d'Kommissioun ze kommen! An ech mengen, datt den Här Meisch wierklech do eng exemplaresch Aarbecht mécht an datt e wierklech do...

► **Mme Martine Hansen (CSV).** - Just hei waren d'Amendementer virgestallt ginn.

► **M. Lex Delles (DP).** - ...all Kéiers...

► **M. Claude Wiseler (CSV).** - Et ass wichteg, Här Delles,...

► **M. Lex Delles (DP).** - Jo, en ass awer a wierklech...

► **M. Claude Wiseler (CSV).** - Ganz wichteg!

► **M. Lex Delles (DP).** - ...bal all Kommissioun do. Dat ass elo Oppositioun/Majoritéit. Do ass wierklech kee Spill. Hei ass et wierklech, datt den Här Minister all Kéiers do ass.

An et huet mech awer och am Virfeld vun dëser Debat e bësse gewonnert, datt dës Projet an eischter Linn dorunner gemooss gëtt, ob et dobause rumouert oder net. Et héiert een näischt méi, et héiert een iwwerhaupt näischt: Dann ass et och näischt!

► **Mme Martine Hansen (CSV).** - Neen.

► **M. Lex Delles (DP).** - Dat hu mer haut de Mëtten nach bal esou...

Ma loosst mech dach ausschwätzen!

(Brouhaha)

Dat huet een...

(Interruption)

► **Mme Simone Beissel, Présidente de séance.** - Den Här Delles huet eleng d'Wuert.

(Interruption)

► **M. Lex Delles (DP).** - „Et héiert een näischt, dann ass et och näischt“, héiert een, an haut de Mëtte waren déi Wiedererëm bal d'nämlech! Mir sollen eis vill méi driwwer freeën,...

(Brouhaha)

...datt mir elo - freeën, an ech betounen och „freeën“! -, datt mir no jorelaangem Hin an Hier an no villen Diskussiounen iwwer eng Lycéesreform kënne ofstëmme, an dat Ganz och, ouni datt jiddwereen op d'Barrikade klëmmt!

Et gouf dee gréisstméigleche Konsens gesicht an deen ass och fonnt ginn. Ech wëll drun erënneren, datt de Bildungsminister Claude Meisch dofir net manner wéi 45 Lycéeë besiche gaangen ass, fir perséinlech an am Dialog mat Direkteren a Schüler gewuer ze ginn, wou de Schong dréckt a wou ee kann Upassunge maachen.

A wann ech de President vun der Proffgewerkschaft FEDUSE de Moien um Radio richtig verstanen hunn - well ech hunn nämlech och nogelauschert -, wier et eischtens emol wichteg gewiescht, datt no laangem Stëllstand iwwerhaupt emol e puer Verännerunge kommen, an zweetens, datt déi Akzenter gesat ginn, déi eis Schoule brauchen. D'Gesprécher hunn also zu eppes gefouert.

Doriwwer eraus gouf sech jo och op Aise baséiert, déi schonn zum eischte Projet virlochen. An och de Collège des directeurs war vun Ufank an agebonnen. Si hu souguer an Aarbechtsgruppe mat un de Reglementer geschafft. Grad si hunn zum Beispill insistéiert, datt d'Regierung net mécht, wat elo vun der CSV gefrot gëtt, nämlech datt all Schüler seng Fächer op der Sektoun a sengem Lycée kéint eraussichen. Dat géif d'Schoule virun immens grouss Erausforderunge stellen a wier organisatoresch net ze meeschteren.

Déi eenzel Lycéeë misste jo och dann ënnerschiddlech Place-horaires ubidden. Do stellt sech d'Fro, ob méi kleng Lycéeën ausserhalb der Stad dat iwwerhaupt géifen organisatoresch hikréien. Ech denke besonnesch un déi kleng Lycéeën am ländleche Raum, wéi zum Beispill Clief oder Réiden. Falls déi Schoulen dat net kéinte stämmen, géif dat net grad zu



enger Diskriminatioun féieren? An eisen Ae wier de Modell vun der CSV, den Effekt also kontraproduktiv.

A firwat soll een iwwerhaapt eppes iwwert de Koup geheien, wat gutt funktionnéiert? D'Zil kann et jo net sinn, alles ze reforméieren, just fir duerno kënnen ze soen: „Majo, mir hunn eng Makroreform op den Instanzewee gesat.“ Eis Schoule si gutt, awer net gutt fir jiddweren. Dat gëtt mat dësem Gesetz op de Leescht geholl.

Kärpunkt vun der Modernisatioun vum Lycée ass sécherlech déi schoulesch Autonomie. Dat ass och gutt esou, well Enheetsbräi schmaacht deene mannste Schüler. An Zukunft sollen d'Schoule besser kënnen op déi verschidden Talenter, Potenzialer, mä och Besoine vun hire Schüler agoen an hir Konzepter a pädagogesch Approchen deementspriedend upassen. D'Schoule réckele soumat méi no bei hir Schüler, déi wéi gesot selwer Programmer kënnen ausschaffen, déi hirer Meenung no am beschten op hire Schülerprofil passen. Dëst ass ouni Zweifel en enorm wichtege Schratt a Richtung vun enger méi diversifizierter Schoullandschaft, déi jo vu ville Säite gefuerdert gëtt.

Ech verstinn dofir och net richtig d'Kritik, datt de Ministère sech domadder géif senger Verantwortung entzéien. Ech géif et am Géigendeel verantwortungslos fannen, wann een d'Schoule géif an hirem Dynamismus an am Innovatiounsgeescht ausbremsen a wann een net géif op de Wee goe vun ënnerschiddleche Schoule fir ënnerschiddlech Schüler.

Vergiesse mer jo och net, datt d'Schoulen dës Autonomie net fir näischt kréien. Si ginn och responsabaliséiert a mussen a siwe Kärberäicher vun der schoulescher Entwécklung eegen Demarchen ausschaffen, déi dann am PDS dokumentéiert ginn. De Ministère leet kloer d'Ziler vun deenen eenzelne Beräicher fest an d'Schoule kréien d'Verantwortung an d'Fräiheet, mat hire Moyenen an eegenen Demarchen dës Ziler ze errechen.

Et ass an deem Kontext och immens wichtig, datt esou vill wéi méiglech Akteuren un deem Prozess kënne deelhuele. De PDS soll d'Resultat vun engem konstruktive Matschaffe vun der ganzer Schoulcommunitéit sinn, eng Aart Roadmap, déi duerno vun esou vill wéi méiglech Leit soll gedroe ginn an déi d'Erfahrung an d'Kompetenze vun deene verschiddene Leit um Terrain soll erëmispigelen.

D'DP begréisst jiddefalls ausdrécklech dës Approche: eng Approche vun ënnen erop anstatt vun uewen erof. Allgemeng mécht dës Regierung vill, fir d'Akteuren um Terrain mat anzebannen an datt d'Projete vun der Schoulcommunitéit gedroe ginn. „Bottom-up“ seet een an dësem Kontext.

Net nëmmen a Lycéeën, och an der Grondschoul hu mir kierzlech hei an der Chamber de gewielte Schoulpresident zum Chef d'orchestre vun enger Equipp gemaach, enger Equipp, déi zesummen hire PDS festleet. Fir d'DP huet dat basisdemokratescht Element seng fest Plaz an der Schoulbänk.

Madamm Presidentin, de Rapporteur huet et virdu gesot: Och kënne an Zukunft d'Sektiounen am Classique méi flexibel gestalt ginn. Déi rigid Kastenbaustruktur ass eiser Gesellschaft an der Villfältgkeet vun hiren Talenter einfach net méi ugepasst. Zudeem erfüllt dëst och net méi d'Erwaardunge vu villen Universiteiten, déi sech ëmmer weider spezialiséieren an dat och vun hire Studente verlaangen. Mat ënnerschiddleche Kombinatiounen erlabe mer de Lycéeën och hei, sech e Profil ze ginn an d'Schüler geziilt a verschiddene Beräicher ze spezialiséieren, déi um Aarbechtsmarché awer och gefrot sinn. Jee no Region oder Demande wier et zum Beispill méiglech, eng Sektoun C op d'Spezifisitéit vun den Ingenieuren auszurichten oder der Biochemie oder nach enger ganz anerer Kombinatioun. Wéi gesot: ënnerschiddlech Schoule fir ënnerschiddlech Schüler.

Parallèl dozou sinn am Moment och sougenannt Kompetenzpolen amgaangen ze entsto. Dozou ziele sécher d'Future Hubs mat de Lycéeën LTE, dem Arts et Métiers an dem zukünftige Lycée Edward Steichen zu Clief oder Lycéeën, déi den Entrepreneursgeescht férdere, wéi zum Beispill méiglech, eng Sektoun C op d'Spezifisitéit vun den Ingenieuren auszurichten oder der Biochemie oder nach enger ganz anerer Kombinatioun. Wéi gesot: ënnerschiddlech Schoule fir ënnerschiddlech Schüler.

Madamm Presidentin, d'Zäite vu Griffel a Schifertafel sinn eriwier. Mir sinn am Zäitalter vu FinTech, Big Data, Robotik ukomm. Dat ass e Fait, deem sech och mussen d'Schoulen upassen. Den Zuch huet d'Regierung Gott sei Dank net verpasst, souguer am Géigendeel: Si sëtzt heibäi an der Lokomotiv!

Vu Klengem u sollen d'Kanner spilleresch un déi nei, intuitiv Léiermethoden eruefouert ginn. Si solle fréi ufänken, e Gespier fir dat Digitaalt ze kréien. Dat ass de Fall am Fundament, wou zum Beispill d'App „MathemaTIC“ d'Course méi lieweg an innovativ mécht. Och déi versprochen iPade wäerten hiren Deel dozou bäidroen.

Virun allem wäert awer och déi nei Sektoun I fir déi néideg Kuelen an der Lokomotiv suergen. Si steet am Mëttelpunkt, wann et ëm d'Förderung vun de sougenannten „e-Skills“ geet. Mir gehéieren hei zu den „first mover“ an dësem Beräich, déi d'Potenzial vun dëse Kompetenzen erkannt hunn an déi d'Schüler an d'Welt vum Numerique antauche loosse. Gläichzäiteg schloe mer mat dëser Sektoun och eng Bréck zum zukünftigen Aarbechtsmarché, op deem informatesch Kenntniss erëmmer méi gefrot ginn. D'Schoule kommen also definitiv am 21. Jorhonnert un.

Madamm Presidentin, besser Startchancen an d'Berufsliewe kritt een nëmmen, wann een d'Chancen net scho fréi an der Schoulcarrière verbaut huet. Zwee Drëttel vun eise Schüler sinn am Général ageschriwwen. Am Verglach mam Classique treffen hei nach vill méi Schüler mat ënnerschiddlechen Hierkonften, Mammesproochen a sozialen Hannergrënn openeen. D'DP huet ëmmer betount, datt dës Diversitéit eng grouss Chance fir eis Gesellschaft wier, mä gläichzäiteg och Ursprung vun enger ganzer Partie Differenzen an der Schoul.

Am Général soll dofir an Zukunft méi differenziert enseignéiert ginn. Mir kënne eis et och einfach net leeschten, datt zum Beispill e fränkofone Schüler weinst enger Mathéschwächt net ka sengem Niveau no Franséisch oder Däitsch léieren. Mam Aféiere vum sougenannten „cours de base“ an den „cours avancés“ gëtt de Problem un der Wuerzel ugepaakt. Op der Huitième sollen esou Coursen am Franséischen, Däitschen an an der Mathé ugebuede ginn, éier dann op Neuvième d'Englescht derbäikënn.

Fir d'DP ass dëst e wichtege Punkt, deen et de Schüler an Zukunft erlaabt, deen Niveau an der Schoul ze suivéieren, deen am beschten zu hire Stärkte passt, ouni awer hir Schwächen ze vernoléisegen. Dës differenziert Approche ass scho laang gefrot, ma elo gëtt se ëmgesat.

Madamm Presidentin, eppes, wat d'Schüler och dierft freeën, dat ass, datt d'Unzuel vu Premièrexamen op sechs erofgeet, an dat fir all Sektoun. Dat ass einfach eng Fro vu Chancëgläichheet tëschent deenen ënnerschiddleche Sektounen hei am Land, mä virun allem och par rapport zu de Schüler am Ausland. Hei zu Lëtzebuerg mussen d'Primaner näamlech bäi Wäitem am heefegste während den Exame schweessen. Mat dëser Verbesserung kréien d'Schüler ab der nächster Rentrée méi Zäit, fir sech op déi eenzel Examen ze preparéieren, wat sech dann och hoffentlech an den Notten erëmispigelt.

Eis Schüler kënne awer souwisou méi wéi dat, wat op hirem Diplom steet. Vill Charakteristike vun eise Schoulssystem komme guer net richtig zum Virschäin: eisen héije Sproochenniveau, d'Engagement vun deenen eenzelne Schüler während hirer Schoulcarrière oder d'Fächer, déi si schonn op Deuxième haten. All dës Saachen zeichnen de Schüler aus, ma stinn duerno net schwaarz op wäiss op hirem Ofschlossdiplom. Dat wäert sech an Zukunft mat engem sougenannten „complément au diplôme“ änneren. D'Universiteiten an d'Patrone solle wëssen, wat se un eise Schüler wierklech hunn.

Och gëtt d'Partenariat tëschent Schoulen, Elteren a Schüler gestärkt. Dëst ass e weidere Baustee vun enger neier Participatiounskultur an och an eise Schoulen. Fir d'DP sinn d'Elteren an d'Schüler ouni Zweifel wichtege Partner an der Schoulentwécklung. Dofir begrësse mer och, datt d'Lycéeën sech an Zukunft mussen Gedanken maachen, wéi se d'Elteren an d'Schüler wëlle mateneen abannen. Zudeem gëtt jo och op nationalem Niveau eng Eltererepresentatioun geschafen, déi als Porte-parole beim Ministère op en oppent Ouer soll toussen.

Madamm Presidentin, déi schoulesch Autonomie, déi méi diversifiéiert an differenziert Schouloffer, déi nei Participatiounskultur an d'Upasse vun eise Schoulen un d'Erausfuerrung vum 21. Jorhonnert, et sinn ënner anere dës Akzenter, déi eis gutt Schoule fir all Schüler besser a méi gerecht maachen. Mir sinn als Demokratesch Partei dovun iwwerzeegt, datt mir mat dësem Gesetz de Kader setzen, fir an Zukunft besser den ënnerschiddlechen Talenter, Potenzialen an och Besoine vun eise Schüler kënne nozekommen. Dat war d'Zil an dat gouf erreecht!

Ech soen lech villmoos Merci fir d'Nolauschteren an ech ginn och den Accord vu menger Fraktioun.

► **Plusieurs voix.** - Très bien!

► **Mme Simone Beissel, Présidente de séance.** - Merci dem Här Lex Delles. Als nächstent ageschriwwene Riedner hunn ech den Här Claude Haagen. Här Haagen, Dir hutt d'Wuert.

► **M. Claude Haagen (LSAP).** - Merci, Madamm Presidentin. D'Reform vum Secondaire: Wann ech hei nolauschteren an och schonn an der Kommissioun, ech mengen, da fanne mer e Konsens hei am Haus an och dobaussen, datt mer eng Reform am Secondaire brauchen. A wat fir eng Richtung datt déi Reform geet, doriwier gëtt diskutéiert. Mir constatéieren awer allegueren zesummen, datt mer déi Reform am Secondaire brauchen, well ganz einfach eis Gesellschaft ännert, well eis Aarbechtswelt ännert a ganz einfach och, well d'Offer dobaussen, d'Unie ronderëm Lëtzebuerg, hei zu Lëtzebuerg och aner Kritäre wäerten opstellen, sou datt mir eis Studenten, eis Schüler, eis Kanner mussen fit maachen ebe fir déi nei Orientéierungen, déi do gefrot ginn.

Madamm Presidentin, léif Kolleeginnen a Kolleegen, zu der Geschicht vun der Demokratisatioun vun eise Land zënter senger offizieller Grënnung gehéiert och d'Demokratisatioun vun eise Schoulen. D'Lycéeën goufen opgemacht fir all Geschlechter. A mir hunn am Laf vun der Zäit d'Schoulpflicht ëmmer nees verlängert, fir méi Jonken eng gutt Formatioun mat op de Wee ze ginn.

Eist Land, an dat ass e puermol ugeschwat ginn, huet sech entwéckelt vun enger Agrarnatioun, duerno engem Industriestat bis zu engem Land mat engem performante Finanzsektor. Eis Schoul huet déi dach awer radikal Transformatioun, déi dës Entwécklung och an eiser Gesellschaft mat sech bruecht huet, mussen begleeten. Mat der aktueller Digitaliséierung, iwwert déi vill geschwat gëtt, an der erwaarter Robotiséierung vu ganzen Deeler vun eiser Wirtschaft, vun eiser Economie, wäert et och an Zukunft zu radikalen Transformatiounen kommen. Eis Schoule mussen eis Kanner also op dës Transformatiounen virbereeden.

Dat maache mer mat dëser Lycéesreform. Mir ginn deene Jonken eng héich Qualifikatioun mat op de Wee, déi et hinne erlaabt, en Universitätsstudium oder en Héichschoulstudium weiderzeféieren a spéider e Beruff ze hunn, an deem se sech als Mënsch an als Bierger entfale kënne. Mir bekämpfen also an deem Sënn och direkt de Chômage a mir festegen och eis demokratesch Wäerter an eiser Gesellschaft.

Madamm Presidentin, déi vill kritiséiert Autonomie vun de Lycéeën ass beileiwe keen Trick vun engem midde Minister, wéi ech oft héieren hunn, dee sech aus senger Responsabilitéit wëll stiel, mä et ass eng Necessitéit, an ech sinn am Ufank drop agaangen, déi de Realiteiten an eise Land muss Rechnung droen. Mir hunn hei zu Lëtzebuerg eng ganz heterogen Schülerpopulatioun an de leschte Jorzénge bäikritt a mir hunn e Lycée, dee gréisstendeels nach op der Reform vun 1968 opbaut, enger anerer Zäit wéi haut.

Déi hei geplangt Autonomie erlaabt et de Lycéeën, d'Erausfuerrungen, déi déi Heterogenitéit mat sech bréngt, ze meeschteren. Dëst andeems mer de Schoulen d'Méiglechkeet ginn, a verschiddene Beräicher méi eegestänneg Decisiounen ze huelen: bei der Organisatioun vun Appui scolaire, dem Encadrement vun de Jonke mat spezifesch Besoinen, der psychologescher a sozialer Hëllef, der Orientatioun vun de Schüler, der Kooperatioun mat den Elteren - ech denken, e ganz wichtege Vollet vun enger participativer Schoul. An och déi dobausse parascolaire offéiert schoulesch Aktivitéiten kënne en Deel dozou bäidroen.

Et sinn d'Lycéeën an hiert Personal, déi dagdeeglech mat deene Kanner, mat deene Studenten am Kontakt stinn, déi am beschte wëssen, wou de Schong dréckt a wéi se d'Talenter vun deem engen oder deem aneren am beschte férdere. Op de Schüler ugepasst Methoden hëllefen an deene Beräicher méi wéi eng generell Decisioun vum Ministère op nationalem Niveau. Dorëms geet et bei der Autonomie.

An dëst ass iwwregens och net komplett nei: Schon 1989 hu mer ugefaangen, de Schoulen et ze erméiglechen, verschidden Optiounen am Kader vun de Sektounen unzebidden. Ech denken dobäi u verschide franséisch Filiären oder de Bac international am Athénée an un déi rezent ugekënnegt chineesesch Coursen och am Athénée an am Lycée Aline Mayrisch. Och, an dat ass traditionell, sinn et hei zu Lëtzebuerg ëmmer verschide Lycéeën ginn, déi verschide Secteuren ugebueden hunn. Ech brauch nëmmen un d'Hotelschoul ze denken, un de Lycée technique agricole, un den ECG oder un d'paramedezinnesch Beruffer bei Lycéeën.

Et geet also och drëms, deene Lycéeën, déi dat wëllen - an ech insistéieren: déi et wëllen, et

gëtt hei kee forcéiert -, d'Méiglechkeet ze ginn, fir selwer iwwer bestëmmte Spezialisierungen decidéieren ze kënne. De Ministère, an dat ass eis als LSAP ganz wichtege, muss natierlech weider derfir suergen, datt de System op nationalem Niveau kohärent bleift. Et dierf op där enger Säit net zur Konkurrenz tëschent de Lycéeën kommen an op där anerer Säit geet et awer drëms, och zum Beispill d'Landesplanung am A ze behalen. D'Proximitéitslycéeën sollen an deem Sënn net komplett verschwannen a mussen sech ergänze bei der Offer vu verschiddene Coursen.

De Lycée wäert also säi Profil definéieren am Plan de développement scolaire, un deem senger Ausschaffung dat ganzt Personal vum Lycée, mä och d'Schüler selwer an d'Eltere bedeelegt sinn. Eis Sektoune sinn den Ament ze vill rigid an erlaben et ganz einfach net, op där enger Säit eng wëssenschaftlech Sektoun ze suivéieren an awer och eng méi pousséiert humanistesche Formatioun unzetrieden. Mir schafen d'Sektounen net of, mä mir maache se op, fir dem Schüler méi Choixen ze ginn a sech besser op d'Exigence vun den Universitéiten un haut kënne virbereeden.

An deem Sënn begréisst d'LSAP och d'Aféierung, et ass e puermol ugeschwat ginn, vun der neier I-Sektoun: Informatik a Kommunikatioun. Bei den aktuellen Evolutiounen an der Aarbechtswelt, déi ech d'éinescht ugeschwat hunn, ass d'Wichtigkeet vun esou enger Sektoun natierlech och evident.

An deem Sënn kierze mir och d'Unzuel vun den Examensfächer, mä Virriedner ass dorobber agaangen, op Première.

Madamm Presidentin, déi grouss Erausfuerrung vun eiser Schoul ass et haut, mat där grousser Sproochenvillfalt ëmzegoen. Mir sinn der Meenung als LSAP, datt de Plurilinguisme eng Beräicherung an eng Chance fir Lëtzebuerg a seng Awunner ass. An der Interpellatioun, ech mengen, et war vum Här Adam, déi mer ongeféier viru sechs Méint haten iwwert de Plurilinguisme am educative Lëtzeburger System, hu mir als LSAP kloer Stellung bezunn. Mir sinn do zur Konkusioun komm, datt d'Méisproochegkeet ouni Zweifel déi gréissten Erausfuerrung ass a bleift, mat där eise Schoulssystem konfrontéiert ass.

D'Schoul muss deene kommende Generatiounen genuch Sproochekenntniss mat op de Wee ginn, fir an eiser méisproocheger Gesellschaft eens ze ginn a fir kënnen Fouss ze faassen, besonnesch op eise Aarbechtsmaart. An engems dierfen awer d'Kompetenzen, déi mir vun de Schüler verlaangen, net zu enger Barrière gi fir hir zukünfteg Entwécklung. Et ass do, wou een de Spagat muss maachen.

An engem Land, an deem ëmmer méi divers Populatiounen liewen, ass dat natierlech net gradesou einfach a wäert och ëmmer erëm a Reforme vum Secondaire a vum Fundamentale zu Diskussiounen féieren. Mir wëllen awer net - an ech mengen, do si mer eis och allegueren eens -, datt et dowéinst an der Schoul zu Echecke kënn, déi net ze rechtfertige sinn. Wéi ee Gefale maache mer näamlech engem Jonken, deen allgemeng talentéiert ass, mä Schwierigkeeten huet an enger vun deene Sproochen: Däitsch, Franséisch oder Englesch, wa mer him dowéinst ee beruffleche Wee oder eng Ausbildung blockéieren? Wéi ee Gefale maache mir domadder am grouse Ganzen och eiser Gesellschaft als Ganz?

D'LSAP setzt weider op Innovatioun a Qualitéit am Lëtzeburger Schoulssystem. Bei de Sprooch brauche mir dofir eng differenziert Approche, fir dës Erausfuerrung ze meeschteren.

Oft, an dëst wësse mer jo schonn zënter verschiddene Joren opgrond vu verschiddenen Etüden, d'MAGRIP-Etüd oder opgrond vun de PISA-Resultater, sinn doduerch Schüler mat auslänneschen Originnen an aus engem méi wéi sozial schwache Milieu vun deem Problem beträff. Ech wëll just drun erënneren, datt de generelle Reglement iwwert d'Schoulen nach ëmmer besteet an datt dee seet - ech mengen, en ass iwwer 100 Joer al -, datt souwuel déi däitsch ewéi déi franséisch Sprooch als Langues véhiculaires vum Enseignement sollt benotzt ginn. A wann een d'Realitéit kuckt, da mierkt ee ganz oft, wann ee Schüler an engem Fach net matkënn, bedéngt duerch seng Sprooch, muss ee fir d'Eischt d'Terminologie an där Sprooch maachen an dann e lues a lues un dat Fach eruféieren.

Elo kann een driwwer diskutéieren, ob een dat op Däitsch soll maachen, ob een dat op Englesch soll maachen, ob een dat op Lëtzeburgeresch soll maachen oder op Franséisch. Fakt



ass, datt een an deem Fach de Schüler, de Student un dat Fach an un dat Wësse soll eru-fieren.

Mir begrëissen dofir och d' Aféierung vun nor-malen a vun avancéierte Sprooch- a Mathema-tikscoursen op den niddrege Klassen am Gé-néral. Doduerch, datt mir de Schüler méi Choix ginn, versiche mer, dës Ongerechtegkeet esou wäit wéi et geet aus der Welt ze schafen. Sécher, domadder ass d' Problematik an der Schoul net ee fir alle Mol geléist.

Madamm Presidentin, mir kommen an Zukunft net derlaanscht, fir eise Sproochenunterrecht weider ze analyséieren a weider ze adaptéieren. Dat ass, wéi gesot, déi grouss Erausfuerderung vun eise Schoulssystem. Ech war dofir och net iwwerrascht, an enger rezenten parlamentare-scher Äntwert vum Minister Meisch ze liesen, datt aktuell een Aarbechtsgrupp „Sproochen“ sech doriwwer Gedanke mécht, a begrëissen dat och am Numm vun eiser Fraktioun. Dësen Aarbechtsgrupp schafft un engem globale Kon-zept. Mir mussen eis mat där Problematik aus-erneesetzen an och no dëser Reform weider Pisten analyséieren, wéi mir eise Schoulssystem méi effizient a gläichzäiteg och méi gerecht kënnen opbauen. Dëst mam Zil, fir eben déi sozial Ongläichheeten esou wäit wéi méiglech ze reduzéieren.

Kolleginnen a Kollegen, déi Suerg louch och, an et ass schonn ugeschwat ginn, am Kär vum Reformprojet vun der deemoleger LSAP-Minis-tesch Mady Delvaux. Ee Reformprojet, deen a grouss Linnen an dësem Gesetz vun der ak-tueller Koalitioun als Basis iwwerholl ginn ass. Schon 2013, wéi den Text virgestallt gouf, huet et geheescht, et wëllt ee méi Flexibilitéit am Enseignement vun de Sproochen aféieren an och de Schüler méi Choix ginn, sech ze spezialiséieren.

Erlaabt mer dofir, am Numm vun der LSAP der Mady Delvaux nach eng Kéier Merci ze soe fir déi grouss Aarbecht an Efforten, déi si fir dës Reform gemaach huet. Jorelaang huet d' Mady Delvaux d' Consultatiounen mat den Akteuren um Terrain gefouert. An déi Consultatiounen, an dat wësse mer alleguerten, waren net ein-fach, waren och contestéiert. Eng Kéier muss een och eng Decisioun huelen. A wann ee Re-formen uschreit, da wësse mer alleguerten, datt et ganz schwiereg ass, bei sämtlechen Ak-teure vum Terrain ee Konsens ze kréien. Uge-schwat op déi sëllege Opposition-formellen, waren déi alleguerten, an dat wësse mer och, historesch bedéngt duerch den Artikel 32.(3) vun der Constitioun.

Fakt ass awer och, wann een elo d' Durée kuckt, wéi laang datt mer iwwer eng Reform am Se-condaire schwätzen, denken ech - an do, mengen ech och, hu mer ee Konsens -, datt et héich Zäit gëtt, datt mer op jidde Fall och eng Reform ëmsetzen. Vill Akteure soen: Et ass bes-ser, Dir gitt an déi dote Richtung! Gitt an déi Richtung! Ech denken, datt et am Interêt vun de Studenten a vun de Schüler ass, eng Reform unzekerbelen an dann natierlech och dozou Ëmännerungen ze maachen. Et wäert beileiwen net déi lescht Reform sinn, déi mer am Fonda-mental oder wéi an dësem Fall am Secondaire wäerte maachen, well mer eis mussen dru win-nen, datt d' Aarbechtswelt ännert an eben och eis Gesellschaft ännert.

Wann ech elo héieren, datt iwwert dës Reform net vill Gedäichs gemaach ginn ass, dann ass dat och vläicht opgrond vun deene Consulta-tiounen, déi virduz gefouert gi sinn, datt vläicht Gras iwwert déi initial Kritikke gewuess ass oder och vläicht scho well Deeler vu Lycéeën een Deel vun deene Changementer anticipéiert hunn an haut scho méi Eegeninitiativen a ver-schiddene Beräicher huelen.

Dofir wëll ech och ganz kloer soen, datt d' Schoul an Zukunft nach evoluéiere muss a wäert, well och eis Gesellschaft net wäert stoe bleiwen. Dat ass, an dat hunn ech gesot, bei-leiwen net déi lescht Schoulreform, déi mer hei wäerten diskutéieren, presentéieren a och zur Ofstëmmung wäerte bréngen.

Madamm Presidentin, d' Wëssen, dat d' Schoul eise Kanner mat op de Wee gëtt, muss idealer-weis wéi eng Zort Liichttuerm an engem Mier vun Ongewësseheet wirken. Erlaabt mer hei déi liicht pathetesche Metapher, mä ech wëll do-madder eigentlech nëmmen den Eesch vun der Problematik, iwwert déi et haut geet, ën-nersträichen. Wann eise Schoulssystem et net fäerdegbréngt, déi Jonk op d' Erausfuerderunge vu muer ze preparéieren, ma dann erleide se ganz einfach Schëffbroch.

Vergiesse mer net, datt d' Formation initiale als éischt Zil huet, fir ze enseignéieren, mä awer och eng Responsabilitéit dréit, fir déi Jonk zum

kritische Bierger an enger fräier an demokrate-scher Gesellschaft ze maachen. «L'École doit être l'endroit où on apprend à penser», sot de Marcel Gauchet. Et gëtt, Kolleginnen a Kollee-gen, an dat muss mer eis an dëser Diskussioun konstant virun Aen halen, en extrem enke Lien tëschent der Schoul an eiser Gesellschaft, eiser Demokratie. Eng schwach Schoul, déi Deeler vun der Gesellschaft ausschléisst, féiert deemno an eng schwach Demokratie, déi och Deeler vun eiser Gesellschaft wäert an Zukunft aus-schléissen.

Madamm Presidentin, fir eis als LSAP ass d' Schoulpolitik de Grondsteen, op där d' Sozial-politik muss opbauen. Eng gerecht an equita-bel Schoul fir jiddwereen heescht net, datt jidd-wereen dat nämlech muss léieren a kënnen, mä just, datt mer jiddwerengem senge Kompe-tenzen a Choixen no et erméiglechen, eng qualitativ Educatioun ze kréien. Eng Edu-catioun, déi hinnen d' Chancen offréiert, net eng Educatioun, déi se hënnert.

Dofir géif ech, nodeem ech dem Rapporteur Merci gesot hu fir säin exzellente schrëftlechen a mëndleche Rapport, och den Accord vu menger Fraktioun ginn.

► **Plusieurs voix.** - Très bien!

► **Mme Simone Beissel**, *Présidente de séance.* - Merci dem Här Claude Haagen. Als nächsten ageschriwwene Riedner hunn ech den Här Claude Adam. De Mëtte si vill Clauden am Asaz. Här Claude Adam, Dir hutt d' Wuert.

► **M. Claude Adam** (*déi gréng*). - Madamm Presidentin, léif Kolleginnen a Kollegen, mam zweeten Ulaf a leider just mat de Stëmme vun der Majoritéit setze mer dann haut d' Re-form vum Enseignement secondaire op d' Schinn. An effektiv, nodeems d' Madamm Delvaux mat ganz vill Oppositionun konfron-téiert war, ass dës Kéier de Projet zimlech schnell an och ouni nennenswäert Opposition du-erch d' Instanze gaangen. Opposition kréie mer der e bëssen hei an der Chamber, mä ech mengen, dat gehéiert zum demokratesche Spill.

Ech hunn et ganz interessant fonnt, och der Madamm Hansen nozelauschteren. Bei der Ma-damm Hansen, déi d' Schoulwelt gutt kennt an déi zum Beispill och schonn eleng iwwert den Numm, wéi mer déi Enseignements sollen nennen, gewisen huet, wéi komplizéiert dat ass, fir iwwerhaapt eng Eenegung ze fannen, fannen ech et schonn eigentlech erstaunlech, datt se net och méi unerkennt, wéi grouss de Konsens awer an de Schoulen ass fir déi hei Re-form.

D' Madamm Hansen war och mat der Ausso: „Bei dëser Reform passéiert näischt, duerfir reegt sech keen driwwer op“ zitéiert ginn an der Press. A mir sinn der Meenung, grad och wéi den Här Haagen gesot huet, datt mer mat dëser Reform kee Schlusstréch ënnert d' Er-neierung vun eise Secondaireschoule kënnen zéien. Mä am Géigesaz zu der CSV si mir awer der Meenung, datt bei dëser Reform ganz vill passéiert.

An datt keng nennenswäert Opposition géint dee Projet entstanen ass, ass virun allem drop zréckzeféieren, datt de Minister sech gutt uge-luecht huet mat engem Tour duerch sämtlech Lycéeën an de Kontakt mat de Leit vum Terrain gesicht huet. Jo, en hat och vläicht d' Chance, datt mer keng brutal Ännerungen am Sproo-cherégim virgesinn hunn. En hat och d' Chance, datt d' Apess méi mat sech selwer beschäftegt ass, wéi datt se Zäit huet fir aner Saachen.

(**Hilarité**)

Mir fannen dat awer gutt, datt de Minister de Konsens gesicht huet an och fonnt huet, well de Sproch kéint vun der CSV sinn: „Reforme mécht ee jo schlisslech mat den Enseignanten an net géint se.“ An duerfir ass dat, wat d' Ma-damm Hansen geiergert huet, datt et esou roueg ass, eppes, wat eis free, datt dat awer roueg iwwert d' Bün gaangen ass.

Mir si sécher, datt mer an deenen nächste Jo-ren nach méi Flexibilitéit am Émgang mat de Sprooche brauchen. Mir sinn awer och der Meenung, datt déi Mesuren an dësem Gesetz an déi richteg Richtung ginn. Mir kënnen wäert-voll Erfahrungs sammelen a mat de Schoulen zesummen eise Sproocherégim weiderent-wéckelen.

Madamm Presidentin, mir sinn net der Me-ening, datt mat dësem Projet de loi näischt an eise Schoule passéiert. Ganz am Géigendeel! Ech probéieren dann och all deenen, déi gudde Wëllen hunn, ze erklären, firwat datt mir zu där Meenung komm sinn. Ech kann och net op all Punkt agoen, mä ech gräifen déi Punkten op, déi fir eis déi wichtegst sinn, an ech erënnere bei där Gleeeënheet un de Rapport vum hono-rabele Claude Lambert, deem ech och wëll Merci soe fir seng zwee, säi mëndlechen a säi schrëftleche Rapport.

En éischte Punkt, an dee schénge esou banal ze sinn, datt bis elo nach keen deen opgegraff huet: Eng vun de gréissten Ännerunge mat, an eisen Aen, ganz nohalteger Wierkung ass d' Embenennung vun de Klassen. Et ass wirk-lech banal. Mir benennen d' Klassen aus dem fréiere Lycée technique haut Enseignement se-condaire général, no deemselwechte Prinzip wéi déi aus dem fréieren Enseignement secon-daire, haut Enseignement classique.

Nodeems ee Schüler seng Cyclen am Enseigne-ment fondamental ofgeschloss huet, kënn en op eng Septième. Packt en déi Septième, kënn en op eng Sixième an da geet dat esou weider. A wann en all seng Klasse gepackt huet, dann huet en eng Première. An da muss mer duerno, wann dat eis dann interesséiert, hannendruschreien, a wéi engem Regim datt en dat gemaach huet.

Den Här Oberweis wëllt mer eng Fro stellen.

► **M. Marcel Oberweis** (CSV). - Jo, Madamm Presidentin, ech wollt den Här Adam drun erënnern, am Joer 2007 an dësem Sall hunn ech deemools d' Madamm Delvaux gefrot ge-hat, dass et un der Zäit wier, dee System ze än-neren. An ech ka mech erënnern, deemools, dat war just viru Chrëschttag, ass dat mat Ap-plaus festgehal ginn, well ech deemools gesot hunn, dass ech jorelaang där jonker Leit viru mer hat an der Klass, fir déi et en Drama war, dass se eng Treizième haten. A mir hunn hin-nen oft genuch missen als Enseignanté Pabeiere matgi fir op d' Universitéit, dass dat gläichgesat wär. Op dee Punkt freeën ech mech awer och perséinlech.

► **M. Claude Meisch**, *Ministre de l'Éducation nationale, de l'Enfance et de la Jeunesse.* - Da stëmmt haut derfir!

► **M. Claude Adam** (*déi gréng*). - Merci. Dann hu mer weinstens ee Punkt, wou mer ee Member vun der CSV hunn, deen eppes gutt fënn, wat mer maachen.

(**Brouhaha**)

Déi eigentlech banal Neierung...

(**Coups de cloche de la présidence**)

► **Mme Simone Beissel**, *Présidente de séance.* - Lues! Den Här Adam huet eleng d' Wuert, wann ech gelift.

► **M. Claude Adam** (*déi gréng*). - Déi eigentlech banal Neierung, déi näischt kascht huet ausser vläicht engem Beamte vum Ministère de l'Éducation nationale vill Nerven a schloflos Nuechten, well deen huet missen alleguerten déi nei Klassen an den informa-tesche System eraffidderen, ass fir eis eng Mesure, déi d' Akzeptanz vum Secondaire général bei den Elteren a Schüler wäert no-haltig beaflossen a vill méi wäert bewierken, wéi ganz vill iwwerluechte Sonndesriede vun deene leschten zéng Joer. An duerfir soen ech da fir d' Éischt dem Här Oberweis Merci fir déi Iddi, der Madamm Delvaux Merci an och dem Här Meisch Merci, datt en déi Iddi weider bestoe gelooss huet an datt mer déi haut kënnen ëmsetzen.

Eng zweet a wichteg Neierung betrëfft natierlech den Émgang mat de Sproochen. Am Enseignement secondaire général féiere mer d' Méiglechkeet an, souwuel an der Mathé wéi an de Sprooche Coursen op zwee Niveauen ze organiséieren: Cours de base a Cours avancés. Dat wäert et de Schüler erméiglechen, Lacun-nen opzeschaffen an net weinst engem Fach an hirer schoulescher Carrière stiechen ze bleiwen.

Natierlech kann ee kritiséieren, datt am Lycée classique an am Cycle supérieur praktesch näischt mat de Sprooche geschitt. Mä mir gesinn dësen éischte Schrëtt emol positiv: Et kënn Bewegung an d' Spill, mir kënnen Erfahrungs sammelen an doropshin eisen Émgang mat der Sproochevillfalt an eise-m Land änneren a verbessern.

Ech hu schonn hei an der Chamber gesot: Fir eis sinn d' Europaschoulen, wat den Émgang mat der Méisproochegkeet betrëfft, dat Bei-spill, wat mer mussen analyséieren, adaptéieren a fir eis ëffentlech Schoule weiderentwéckelen. Erfahrungs hu mer schonn am Internationale Lycée zu Perl gesammelt. Mir sammelen der a verschiddenen ëffentleche Schoulen, déi de Bac international ubidden. Mir sammele wäert-voll Erfahrungs an der Internationaler ëffent-lecher Schoul zu Déifferdeng. An ech war frou, wéi ech virun enger Woch de Minister Meisch um Radio héieren hunn, wou hien annonciéiert huet, datt hien am Zentrum an am Norde wëllt speziell Sproocheprogrammer an zwee Lycéeën ubidden, déi sech un europäesche Programmer orientéieren. Vläch, wann de Minister Zäit huet, kann en och hei op dëser Plaz e puer Detailer nach zu deenen Iddie ginn. Iddien, déi mir a priori positiv fannen an ënnerstëtzens-wäert.

E weidere wichtige Punkt vun dëser Reform ass och, datt déi verschidde Schoule méi Auto-

nomie kréien. An dem Rapport vun der Schoulkommissioun steet souguer, et wier e Paradigmewiessel: D' Leit an der Schoul géifen elo éischter agéieren an net méi just exe-kutéieren. D' Schoulautonomie huet Virdeeler, si huet awer och e puer Nodeeler. Prinzipiell si mir fir eng Schoulautonomie, déi sech, an engem Kader, dee vum Ministère de l'Édu-cation nationale gesat gëtt, kann entwéckelen. Nationale Referenzkader heescht dat.

Wann een déi grouss Verschiddenheet vun de Kanner bei eis kennt, kann et net een Eenheetsmodell fir se all sinn. An awer, ech hunn dat och scho méi oft gesot, fanne mir de Motto „Vill verschidde Schoule fir vill ver-schidde Kanner“ net glécklech. Firwat? Majo, mat deem Sproch riskéiere mer, d' Acquis vum 20 Joer Inklusiounspolitik an eise Schoule liicht op d' Spill ze setzen. Mat e bësse schlechtem Wëllen, ech ënnerstelle kengem schlechte Wëllen, mä mat schlechtem Wëlle kann een dee Sproch weiderdeklinéieren: Mir brauchen eng Schoul fir Kanner mat Lernschwie-regkeeten, mir brauchen eng Schoul fir Kanner mat Migratiounshannergrond, mir brauchen eng Schoul fir d' Surdouéen a mir brauchen eng Schoul fir d' Sousdouéen. Dat, mengen ech, ass net esou geduecht. Duerfir hu mer méi mat der sproochlecher Ausrichtung wéi mat der Ausrichtung vun der Reform e Problem.

Mir sinn och nach ëmmer der Meenung, datt de Lycée de proximité fir all Kanner, déi an der Noperschaft vum Lycée wunnen, net iwwerholl ass, mä schonn eleng aus verkéierstheesche Grënn nach ëmmer richteg ass, besonnesch fir d' Schüler vum Cycle inférieur.

Ech ginn dervun aus, datt mer datselwecht mengen, Här Minister: Mir brauchen eng ëffentlech Schoul, déi esou flexibel ass, datt se mat der Heterogenitéit an eiser Gesellschaft an an eise Schoulen eens gëtt. Autonomie vun de Schoulen ass ee Moyen, fir ze hëllef. Aner Moyene sinn de Plan d'étude, eng aner Approche zu de Sproochen, den Appui an den Encadrement vun eise Schüler.

Eng gewëss Autonomie vun de Lycéeën dréit de Beméiunge vun den Direktiounen an den Ense-ignanté Rechnung. Dat wäert d' Aarbecht vum Terrain op an dat ass gutt esou. Et ass schonn e bëssen erstaunlech, datt den SEW dës Reform kritiséiert, well se den Enseignanten ze vill Mat-sproocherecht géif ginn. Fairerweis fir den SEW muss ee soen, datt en awer och a sengem Rap-port kritiséiert a fäert, datt mer zu enger Situa-tioun «de pouvoir des directions des lycées» kéi-men, déi ecrasant géif ginn. Also et ass awer schonn och e Gläichgewicht beim SEW.

Eng gewëss Autonomie vun de Lycéeën ass gutt, well et nun emol esou ass, datt net all Ly-cée alles kann ubidden an datt et och haut scho Lycéeë gëtt, déi sech Schwéierpunkte ginn. Mir mengen och, datt d' Autonomie net op d' Käschte vun deene klenge Lycéeë muss goen, éischter am Géigendeel. Do muss een dat natierlech suivéieren, an ech mengen, de Minister mécht dat och. Mir brauchen déi Vill-falt an déi ass net zu Laaschte vun deene Klen-gen oder deene Groussen.

D' Autonomie vun de Lycéeën, ech mengen, do si mer eis alleguerten eens, stéisst un hir Grenzen, wann et ëm d' Zertifizéiere geet. Mir gesinn zurzäit keng Alternativ zum nationalen Ofschlossexamen. Natierlech gëtt et och haut scho verschidde Premièresdiplomer. An Zu-kunft gëtt et der wahrscheinlech nach méi. Mir hunn eng Classiquespremière an eng Tech-niquespremière, oder eng Généralspremière, pardon, eng mat enger Rei Fächer, déi net bei jiddwerengem d' selwecht sinn, e Premières-exame plus Notte vu Fächer vun Deuxième an esou weider an esou virun.

Mir begrëissen dat, erënnern awer drun, éischstens, datt een Diplom engem Schüler nëmmen eppes zertifizéiere kann, wat en och kann, an zweetens, datt en Diplom vun enger Première XY muss deeselwechte Wäert hunn, ob en am Norden oder am Süden oder am Zentrum oder am Oste geschriwwen ginn ass.

D' Autonomie an de Lycéeën däerf och net esou wäit goen, datt een e Wiessel vun engem Lycée an deen aneren onheemlech schwéier mécht. Mir kënnen eis net engersäits drëm beméien, d' Passerellen tëschent dem Régime classique an dem Régime général opzebauen an duerch eng galoppéierend Schoulautonomie d' Passe-rellen anzeräissen. Mä duerfir hu mer jo den nationale Referenzkader, deen derfir wäert suergen, datt dat net geschitt.

Madamm Presidentin, mir begrëissen all déi Mesuren, déi an dësem Gesetz stinn an eng Verbesserung vum Appui a vum Encadrement fir d' Schüler bréngen. Mir fannen et och gutt, datt d' Lycéeën elo, d' selwecht wéi am Fonda-mental, eng Commission d'inclusion scolaire kréien.

(**M. Mars Di Bartolomeo reprend la prési-dence.**)



Mir begrëssen och, datt mer an Zukunft wëlen e weidere Schwéierpunkt Internet an Informatik setzen. Mir sinn der Meenung, datt et gutt ass, fir eng I-Sektoun ze schafen. Mir fanne awer virun allem och, datt d'Compétences numériques transversal Kompetenz sinn an duerfen an alle Klassen an an alle Regimenter gefërdert solle ginn. An et ass och wëschenswäert, datt Open Data matabezu ginn an net just déck Virementen u Microsoft gemaach ginn.

An et schéngt an eisen Aen och ganz wichteg, de Support technique auszubauen, an zwar systematesch a massiv. Mir kréien ëmmer erëm nach erzielt, datt et engagéiert Enseignantë sinn, déi mat vill Asaz an am Weekend den technesch Support an hire Schoule musse maachen. Déi staatlech Hëllefdséngschter sinn net ëmmer an der Lag, fir schnell ze reagéieren, wann e System zesummebrécht. Et ass wichteg, datt, wa mer all Schoul mat Tabletten oder Aänlechem equipéieren, datt, wa mer ëmmer méi interaktiv Tafelen an eis Schoule kréien, mer dann och personell esou opgestallt sinn, datt schnell kann op technesch Panne reagéiert ginn.

Här President, mir begrëssen et och, datt d'Eltere méi matabezu ginn an de Lycéëen. Mir fannen et gutt, datt een Elterevertrieeder am Comité de discipline vertrueden ass. Wann et drëm geet, ob ee Schüler muss vun der Schoul verwise ginn, da concernéiert dat natierlech och d'Elterschaft. A mer verstinn eigentlech net, firwat datt d'Chamber vun de Statsbeamte sech do dergéint ausschwätzt. Mir begrëssen och, datt d'Schülerkonferenz opgewäert gëtt. D'CNEL hat sech jo am Virfeld vun dësem Gesetz och kompetent, géif ech mengen, zu Wuerd gemellt.

D'Avise vun deenen anere Beruffskummere si jo duerchweegs positiv. An déi Punkten, déi si opwerfen, kënnen mer ënnerstëtzen. D'Chambre des Salariés seet zum Beispill, datt et schued ass, datt déi zwee Ordre vum Secondaire no verschiddene Regele funktionéieren. Ech hu jo scho gesot, wéi wichteg datt mir d'Gläichbenennung vun de Klasse fannen. Dat ass an eisen Ae schonn ee kleng Paradigmewissel an do hu bestëmmt schonn eng ganz Rei Leit genuch drun ze knaen. Et ass Bewegung an d'Spill komm an d'Entwécklung ass jo nach eréischt am Ufank.

Et ass fir eis och net glécklech, datt mer am Secondaire classique d'Orientatioun no der Quatrième maachen, am Secondaire général awer schonn no der Cinquième. An et wier och gutt, wann d'Schüler vum Secondaire classique och ee Kontakt mat der Aarbechtswelt kéinten hunn. Dat gëtt iwwregens och vun dëse Schüler selwer esou emfonnt. Dat wier och am Interessi vun enger besserer Orientatioun. Eng Orientatioun, wou mer déi Verbesserungen vun dëser Regierung unerkennen a begrëssen, wou awer selbstverständlech ëmmer nach Sputt no uewen ass.

Mir sinn och zefridde mat enger Rei vun Ouverturen, déi dëst Gesetz am Secondaire mécht. Esou zum Beispill de méi grouse Choix, deen d'Schüler innerhalb vun de Sektoune kréien. Et ass och dervu geschwat ginn, scho vun de Kolleegen hei ernimmt ginn, datt de Premièresexamen manner Fächer préift an duerfir awer complementaire Notte kënnen derbäi sinn. Dat sinn alles Entwécklungen, déi mer begrëssen.

Här President, mir si frou, datt mer dës Lycéesreform, déi sech schonn 2011 mat engem Avant-projet de loi ugekënnegt huet, schlussendlech esou schnell iwwert d'Bün kritt hunn an datt mer awer eng grouss Akzeptanz bei de Schoulpartner dobause fonnt hunn. Dat neit Gesetz trëtt also fir d'Rentrée 2017-2018 a Kraaft, wa mer dat dann haut stëmmen, wou ech dru gleewen. D'Gesetz stëmmen ass e ganz wichtigen Akt, d'Gesetz ëmsetzen ass een net manner wichtigen Akt. De Minister hat gesot, et géif eng Iwwergangszäit gi vu ronn engem Joer, bis all Bestëmmungen musse ëmgesat ginn.

Ech bréngen den Accord vun der grénger Fraktioun zu dësem Gesetz an ech wier frou, wann de Minister eis nach herno vläicht kéint e bëssen eppes iwwert déi praktesch Ëmsetzung vun dësem Gesetz soen. Ech soen lech Merci fir Är Opmerksamkeet.

► **Plusieurs voix.** - Très bien!

► **M. Mars Di Bartolomeo, Président.** - Merci och dem Här Adam. An nächste Riedner ass den Här Fernand Kartheiser.

► **M. Fernand Kartheiser (ADR).** - Här President, Dir Dammen an Dir Hären, och vun eiser Säit aus e grouse Merci un den Här Lamberty, deen eis wéi ëmmer e komplizéiert Gesetz ganz kloer presentéiert huet.

Et ass interessant, hei de Rieden nozelauschteren. Ech wëll vläicht ufänke mat de Kommentaren, déi vu menger Nopeschpartei hei, der CSV

bruecht gi sinn an dëser Diskussioun. Ech si jo och en Oppositionspolitiker, ech muss awer soen, datt ech Problemer hu mat där Argumentatioun, déi d'CSV hei bréngt. Et ass eigentlech net nozevollzéien, datt eng CSV, déi hei seet: „Et ass eng kleng Reform, eng Mikroreform“, nëmme ganz kleng Beanstandungen eigentlech virbréngt. Si stellt dee Gesetzesprojet vun der Regierung net grondsätzlech a Fro. Si mécht esou kleng..., wann dat do eng Mikroreform ass, da proposéiert d'CSV esou infinitesimal Verännerungen an dann ass se eigentlech net d'accord.

Et ass och fir mech erstaunlech, ze mierken, datt d'CSV wëllt esou d'Englescht promouvéieren, och an enger Motioun eis dat hei proposéiert, ouni ze soen, ob op Septième, wat se proposéiert, Englesch soll fakultativ oder obligatoresch agefouert ginn. Et ass awer e wichtigen Ennerscheid. Dat steet net dran! A virun allem wonnert et mech, datt d'CSV net den Ennerscheid mécht tëschent Sproochen, déi hei am Land benotzt ginn, a Sproochen, déi en offizielle Statut hunn. Däitsch a Franséisch hunn en offizielle Statut, dat sinn Amtssproochen niewent Lëtzebuergesch. An ech mengen, an der Diskussioun muss een deem awer an engem Parlament Rechnung droen. Dat si grondsätzlech Ennerscheeder.

D'CSV ass hei nach an enger Nostalgie vun där Regierung virun, vun den Delvaux-Reformen, mä d'Zäiten hu sech awer geännert. Wann och d'CSV hei seet: „D'Schüler misste méi Choix hunn“, da freet ee sech awer wierklech: Ass dat iwwerhaupt ëmsetzbar, mat deene komplizéierten Erausforderungen, déi d'Schoulen elo souwisou scho kréien, wa se hir Sektoune musse méi flexibel maachen?

Et ass fir eis net nozevollzéien. Mir sinn och net d'accord mat dësem Gesetz, awer ech mengen, datt mer vill, vill besser Ursaachen hunn. An et ass iwwregens, an elo kommen ech awer un eis Gambia-Parteien, wann ech héieren, datt dëst Gesetz justifiéiert gëtt vun der Säit vun de Regierungsparteie mat esou Sätz wéi: „Mir brauchen dëst Gesetz, well d'Gesellschaft sech geännert huet“ oder „well d'Gesellschaft sech ännert“, dann ass dat natierlech eng Banalitéit. Dir kéint gradesou gutt soe wéi den Här Trudeau a Kanada: „Well mer am Joer 2017 sinn.“ Dat geet eleng net duer. Mir muss kucken...

(**Interruption**)

Mir musse kucken, wat elo hei genau proposéiert gëtt an dat bewäerten.

Et si gutt Punkten an dësem Gesetz. Ech wëll dat soen: Et sinn eng Rei Punkten, déi eis och gutt gefalen. Zum Beispill méi Inklusioun ass eng gutt Saach fir déi Jonk an d'Kanner mat spezifische Besoinen. Och, an dat dierf een och net vergiessen, wéi déi Surdoués, dat ass jo och extra ernimmt ginn am Gesetz, och dat ass e wichtige Punkt.

Et ass och gutt, datt d'Schoule méi Autonomie kréien an e eegene Profill. Dat ass sécher gutt, mä dat ass net bis zu Enn geduecht. Well wie seet „eegene Profill“ - wat jo hei gewënscht ass, méi Autonomie -, dee seet och „Konkurrenz tëschent de Schoulen“. Et gëtt ëmmer esou gemaach als hätt dat eent mat deem aneren näischt ze dinn, als wär dat eent net eng logesch Konsequenz vun deem aneren. Dach! Wie seet „eegene Profill“, dat féiert zu enger gewëssener Konkurrenz, awer et ass net bis zu Enn geduecht.

Eng Konkurrenz tëschent de Schoulen, déi mer noutwendegerweis à moyen terme kréien, dat géif och heeschen, datt d'Schoule méi e groust Matsproocherecht hunn, wat déi Schüler ugeet, déi sollen dohikommen. Et bedéngt eng Rei vun Encadrementsmoosnamen, fir sozial Ongerechtegkeeten oder regional Ongläichgewiichter ze verhéieren.

Dat heescht, mir ginn op e Wee, dee mer prinzipiell begrëssen als ADR, mä deen hei net bis zu Enn geduecht ginn ass, mat all senge Konsequenzen. Autonomie vun de Schoulen, do soe mir däitlech: Jo! Konkurrenz souguer och: Jo! Awer et bedéngt Begleedungsmoosnamen, fir dat kënnen effikass ze steieren.

Mir hunn hei eng Rei vu Reflexiounen, déi mer nach musse féieren iwwert d'Ausrüchtung vun der Schoul. Et ass gesot ginn - et ass jo de Slogan vun der Regierung -: „Ënnerschiddlech Schüler, ënnerschiddlech Schoulen.“ Mä wat d'Regierung... E Gedanken, deen an dem ganze Gesetz net virkëent, dat ass eigentlech dee Gedanke vun der Integratioun. Dat ass den Androck, wéi mer en dacks hunn an Texten vun der Regierung, och an der Schoul, datt dat eigentlech en Domän ass, deen an der Vergiess geroden ass. En Usproch, deem d'Schoul sech net méi wëllt stellen. Et gëtt gesot: „Jiddweree kritt seng Schoul“, awer den Integratiounswëllen, fir jiddwereen an eng lëtzebuergesch Gesellschaft, fir dat esou ze ënnersträichen, kënnen ze integréieren, dee feelt.

Mir hunn eng heterogen Schoulpopulatioun - dat seet jiddwereen -, mä wat ass d'Konsequenz dovunner, datt mer ëmmer méi international Filiären an eiser ëffentlecher Schoul hunn? Wat ass d'Konsequenz dervun, datt mer och ëmmer méi international Schoulen zu Lëtzebuerg hunn? Mä dat féiert jo derzou, datt eng Rei op jidde Fall vu Schüler, déi net mat deem traditionelle lëtzebuergesch Modell, der Dräisproochegkeet, wéi mir se kennen an esou weider, d'accord sinn oder fir sech eppes anescht wënschen, an déi munch aner Angeboter eriwuerwiesselen, déi et ëmmer méi gëtt.

Dat heescht, u sech ass den Ëmkéierschloss dovunner, datt déi lëtzebuergesch Schoul erëm méi tendenziell homogen gëtt iwwert d'Zäit, well jo esou vill anerer dee Wee verlossen. Oder ass dat net de Fall? Kuckt d'Regierung dat doten? An dann hu mer et an eisen traditionellen Schoultyp vläicht iwwert d'Zäit och erëm mat méi enger homogener Schoulpopulatioun ze dinn. Et ass eng soziologesch Fro, déi mer mussen am A behalen.

Dat Zweet ass d'Ausrüchtung vun der Schoul. Et ass gesot ginn, datt d'Schoul sech de Schüler soll upassen. Dat ass sécher net falsch, mä och dat geet net duer. Als Land, als Politik hu mer och eng grondsätzlech Aufgab, an déi ass, fir ze kucken: D'Schoul als Agent an eiser Gesellschaft, wéi kann déi sech afügen? Wat ka si bäidroen, fir dëst Land a seng eegen Zukunft ze projezéieren als Stat, als Gesellschaft, als Land? Net nëmmen op de Schüler bezunn, mä och an eiser staatlecher Form. Wat kënnen mer maachen, fir eis Gesellschaft, eis Lëtzeburger Gesellschaft, eis Gesellschaft an d'Zukunft ze projezéieren? Och do huet d'Schoul en Optrag. An och dee gëtt an dësem Gesetz net ernimmt. En ass awer legitim, well all Land stellt sech déi Fro. An déi ëffentlech Schoul huet den Optrag, och d'Gesellschaft an hir Zukunft ze projezéieren.

Dozou gehéiert et och, datt mer déi traditionell Dräisproochegkeet vum Land bäibehalen. Et ass en Defizit vun dësem Gesetz. An ee vun deene Grënn, firwat mir et net stëmmen, dat ass, datt deen Usproch, dee virun e puer Joer erfonnt ginn ass an dee mer begrëisst hunn, näamlech fir eng lëtzebuergesch Sektoun an de Lycéëen anzeféieren, datt deen net erfëllt ginn ass.

Dat ass en Usproch, deen eng Ambitioun hat, deen och de Wäert vun der Lëtzeburger Sprooch ënnerstrach hätt. Hei ass en net erfëllt ginn. Eng Regierung, déi nach viru Kuerzem e 40-Punkte-Programm wollt presentéieren iwwert de Wäert vun der Lëtzeburger Sprooch, huet hei wierklech eng grouss Chance verpasst, fir kënnen hir Gläwiedegkeet mat deem Beweis ze ënnermaueren. Dat huet se net gemaach. A jiddweree gesäit do, wéi eng Konkusioun sech imposéieren.

Och sinn do Nodeeler, e relativ liichtfankegen Émgang mat de Sproochen an de Schoulen awer feststellen. Wann et elo méiglech gëtt, den Technique oder de Général an enger Filière praktesch ganz op Franséisch ze maachen, stellt sech eben d'Fro vun der Integratioun an der Méisproochegkeet. An och wann een elo seet: „Mir kënnen d'Mathematik zum Deel op Däitsch maachen“, da muss ee warne virun engem Feelschluss. Mathematik op Däitsch ass net onbedéngt méi einfach wéi Mathematik op Franséisch. Et ass dacks e Feelschluss, fir dat esou unzuhuelen, zemoos wann da spéider d'Sprooch erëm muss geännert ginn. Alles dat si Falen oder Problemer, déi eventuell kënnen optauchen.

En anere Grond, firwat d'ADR géint dat Gesetz hei ass, ass, datt den Nivellement vers le bas net gestoppt gëtt. An et ass eis awer wichteg, datt mer eng Schoul mat Qualitéit a mat Leeschtungsusproch hunn, och well eist Land net eleng dosteet, mä an der Konkurrenz steet mam Ausland, mat der Groussregioun. An et wär wichteg, fir do Gesten ze setzen.

Déi Diskussioun iwwert de Premièresexamen ass symptomatesch. Ech wëll déi elo hei net féieren, mä hei gëtt gesot: „Et ass gutt, mir ginn op sechs Fächer erf.“ Esou als wär dat en Naturgesetz, als misste mer dat net hannerfroen oder net kënnen anescht iwwerleeën.

Mä wär et am Kader vun engem Nation Branding net och méiglech gewiescht alternativ, fir ze soen: „Eise Premièresexamen huet einfach méi Niveau wéi deen aneren“, deen ze valoriséieren an domadder eise Schüler, déi am Ausland wëllen op eng Universiteit goen, e Plus matzeginn? Dee Wee ass net gewielt ginn. Et ass direkt gesot ginn: „Mä mir essen eis dann un. Mir setzen den Niveau erf“, esou als wär dat en Naturgesetz. Ech mengen net, datt dat en Automatismus muss sinn.

D'Promotiounskritäre si relativ niddreg. D'Fai-blessen an d'Lacune solle gekuckt ginn am-plaz d'Talenter. Mä firwat net Feeler verbessern? Mir gesi jo am Statexamen an op

villen anere Plazen am private Secteur, wéi grouss d'Onzeffriddenheet ass mam Niveau vun de Schoulen duerch d'Kompensationsméiglechkeeten, duerch d'Opspléckung am Domaine de compétences, déi och hei am Gesetz virgesi sinn.

D'Grammaire gëtt net ernimmt. Wa vun de Sproochen hei an deem Gesetz geschwat gëtt, da gëtt geschwat vu Sprooch a Literatur, souguer vu Komparatistik. Awer datt dat op Basis vun enger zolitter grammatikalescher Beherrschung vun der Sprooch soll sinn, och dat gëtt net méi ernimmt.

Mir hunn eis also d'Fro gestallt, ob et net nach zu méi enger grousser Flucht vu Kanner a Privatschoule kënnt. An dat ass eng grouss sozial Ongerechtegkeet. An et muss een der LSAP ëmmer erëm virun Aen halen, datt si et ass mat hirer Schoulpolitik, déi u sech eng sozial Ongerechtegkeet hierstellt. Well déi gréisste sozial Gerechtegkeet besteet dach doranner, datt een onofhängeg vun deem soziale Milieu, wou een hierkëent, eng gratis ëffentlech Schoul huet, déi engem zu enger héijer Qualifikatioun verhëlft.

► **M. Roy Reding (ADR).** - Très bien!

► **M. Fernand Kartheiser (ADR).** - An dat ass hei net méi de Fall: d'Aféierung vun enger sozialer Ongerechtegkeet duerch d'Erofsetze vum Niveau vun der ëffentlecher Schoul.

(**Interruption**)

Fir eis wieren nach aner Saachen dran. Ech gesinn, datt ech e bëssen ënner Zäitdruck sinn, dofir wëll ech just nach op ee Punkt agoen, deen awer ganz vill Leit hei am Land betrëfft. An dat ass d'Situatioun vun deene Kanner, déi a Scheedungs- oder Trennungssituatiounen doheem musse liewen.

Et wär, mengen ech, eng Selbstverständlechkeet gewiescht, datt an dësem Gesetz festgeschriwwen gi wär, datt d'Schoul mat deenen zwee Elterendeeler muss - muss! - a Kommunikatioun sinn, datt déi zwee Elterendeeler mussen d'Zensur kréien, datt se mussen um Lafende gehale ginn, wat mat hirem Kand an der Schoul ass.

Dat wär eng Moderniséierung gewiescht, net d'Erofsetze vum Niveau. Dat ass keng Moderniséierung. Dat ass e Verloscht u Qualitéit. Awer d'Abzeiung vun deenen zwee Elterendeeler an hir Responsabiliséierung, hir Ermächtigung, och hir Autoritéit ze respektéieren, dat wier eng Moderniséierung gewiescht an eise Schoulssystem. An och déi Chance gouf leider verpasst.

An aus all deene Grënn wäert d'ADR dëst Gesetz net matstëmmen.

Ech soen lech Merci.

► **Plusieurs voix.** - Très bien!

► **M. Mars Di Bartolomeo, Président.** - De leschten ageschriwwene Riedner fir dëse Projet ass den Här David Wagner. Här Wagner, Dir hutt d'Wuert.

► **M. David Wagner (déi Lénk).** - Merci, Här President. Bon, wann ee mat engagéierten Enseignantë schwätzt, wann een och liest, wat se schreiwen, da kënnt ëmmer erëm datselwecht, net nëmme bei dëser Reform, mä et ass scho bal symptomatesch, datt keen Dialog gefouert gëtt mat den Enseignanten, mat de Gewerkschaften.

Dat ass eppes, wat net den Här Meisch erfonnt huet, dat ass scho virdu gemaach ginn. Ech hunn et selwer och als Schüler erlieft deemools, als Schoulgewerkschaft. Ech hunn ëmmer den Androck, datt de Ministère de l'Éducation nationale, well et e komplizéiert Ministère ass a well en esou schwéier Reforme muss duerchsetzen, konfrontéiert ass och natierlech mat verschiddene Corpsen - dat sinn d'Schüler natierlech, d'Proffen, d'Enseignanten, d'Elteren an esou weider -, a well et och eng wichteg Tache ass, datt oft de Choix gemaach gëtt, fir einfach emol derduerch ze goen a fir dann Decisiounen ze treffen, ça passe ou ça casse. A wuel wëssend, datt och den Engagement zu Lëtzebuerg, sief e politesch oder gewerkschaftlech, u sech ëmmer méi schwéier gëtt, well d'Leit ëmmer manner Zäit hunn, da kann een esou Saachen duerchzéien.

Ech mengen, et ass eng allgemeng Iwwerleeung, wann een driwwer diskutéiert: „Jo, et huet bal keen eppes gesot. Et ass net wouer.“ Mä hunn d'Leit och ëmmer d'Méiglechkeet, sech esou ze engagéieren, wéi se et wëllen? Zemoos Enseignanten. Et ass net ëmmer esou evident, entgéint deem, wat ee kéint mengen.

Ech mengen, et sinn zwou Saachen, zwee Punkten, déi eis staark dru stéieren an déi och



erklären, firwat mir wäerten dëse Projet de loi net matstëmmen.

Jo, mir ginn an eng Richtung vun der Kreatioun vun autonome Schoulen a Lycéeën, déi a Konkurrenz matenee sinn. D'ADR bemängelt, datt et net wäit genuch geet, mä de Fait nëmmen, datt d'ADR, den Här Kartheiser, virdrun och gesot huet a saluéiert huet, datt et awer schonn e bëssen an déi Richtung vun der Konkurrenz geet, ass eng Bestätegung vun deem, wat och d'Gewerkschafte soen, an hir Ängschten, an d'CNEL d'ailleurs och, d'Schülerrepresentatioun.

Elo hu mer en anere Problem justement. Dat ass dee vun der Selbstbestëmmung vun den Akteuren an der Schoul, well trotz alledem hu mer an de Schoule weiderhin, och wann de Conseil d'éducation do ass... dat sinn alles schlussendlech konsultativ Organer, wou d'Direktioun duerno eppes ze soen huet. Dat heescht, a Wierklechkeet hu mer Konkurrenz an net Solidaritéit tëschent de Schoulen an eng solidaresch Schoulpolitik. An anerersäits hu mer u sech éischter managerial Methoden, awer keng richtig Selbstbestëmmungsmethoden, wou Schüler, wou Profen innerhalb vun engem Gebai wierklech kënnen gestalten.

Mä iergendwéi ass et jo och normal, wann de Projet de loi iergendwéi net demokratesch ausgeschafft ginn ass. Dat heescht, wann e mat weineg Diskussioun mat de betrouffene Leit ausgeschafft ginn ass, dann ass et jo och kee Wonner, datt mer schlussendlech och kee ganz demokratesche System hunn.

Iwwerhaupt, och wat d'Matsproocherecht vun de Schüler ugeet, do hätt ee sech awer kënnen nach iwwerleeën... Eng kleng Klammer; dat huet nach kee gesot, mengen ech, hei, ausser ech hätt et verpast, mä: D'Matsproocherecht vun de Schüler kéint nach gestärkt ginn. Mir hunn e Gesetz iwwert... Also, mir hunn e Conseil national des élèves, mir hu Schülercomitéën. Déi gi gewielt. Virun 30 Joer war dat nach net esou systematesch.

Mä et kéint ee sech awer virstellen, datt déi Wahlen och e bësse méi systematesch gefouert ginn, datt heescht all zwee Joer zum Beispill oder all Joer, dat hänkt dovunner of, national-wäit, datt do eng richtig Campagne gemaach gëtt, fir dat ze promouvieren, datt och Schüler, déi a Schülercomitéën sinn, ënnerstëtzt ginn an esou weider an esou virun.

Ech mengen, do ass och d'CNEL, déi Saache mécht, mä déi hunn och net ëmmer d'Mëttele, fir dat alles ze maachen. Ech mengen, dat ass eppes, wat een och hätt kënnen betruechten, fir justement och de Schüler déi Méiglechkeeten ze ginn, fir sech kënnen ze engagieren an hinnen och de Goût ze ginn, fir sech ze engagieren.

Ech mengen awer och, de Problem mat Educatiounsprojeten an och mat dësem Projet de loi ass, datt net alles drasteet, mä datt een u sech a Wierklechkeet e bëssen den Androck kritt ze wëssen, a wat fir eng Richtung e geet. A wa mer soen, datt et wierklech an eng Richtung geet vu Konkurrenz a vun Deelprivatisierung vun de Schoulen, lues a lues, scheibchenweise, da kann een dat natierlech net am Text esou direkt erëmfinden. Mä an de Fakte wäert dat awer an déi Richtung goen.

An ech mengen, datt all déi Ängschten, déi do bestinn, fir ze soen, datt mer verschidde Lycéeën wäerte kréien, op verschiddene Plazen, geografesch, deemno wéi, datt se aner Profiller hunn an aner Coursen ubidden, dat ass eng Realitéit. A mir kënnen dat jo och scho gesinn. Bei der Uni ass et jo esou. Bei der Uni am Uni-System ass et jo esou. Do ass et jo esou, datt Chairé finanziert ginn an datt schlussendlech d'Unie quasi total ofhängeg si vun der privater Industrie, fir iwwerhaupt Coursen unzibidden, wat ganz problematesch ass fir d'Recherche a wat d'Recherche an eng ganz gewësse Richtung dréckt. A mir fäerten, datt et och beim Lycée an déi Richtung wäert goen.

De Slogan, jo, deen heescht: „Verschidde Lycéeën fir verschidde Schüler.“ Den Här Claude Adam huet sech awer zu Recht kritesch gewisen - hei ass en - par rapport zu dësem Slogan, mä ech mengen, de Slogan, dee seet dat aus, wat awer wierklech och u sech ugeduecht ass. Well a Wierklechkeet misste mer jo éischer an eng Richtung goen, datt all Lycée soll do si fir all Schüler a sech un all Schüler adaptieren.

Mä natierlech, da gëtt gesot: „Mä all Lycée, all Schoul kann net alles ubidden, all Cours ubidden“ an esou weider. Ech weess net, ob all Lycée all Cours muss d'selwecht ubidden. Dat war och fréier net onbedéngt ëmmer de Fall. Dann huet ee missen de Lycée wiesselen, wann

een Italienesch oder Spuenesch geléiert huet zum Beispill. Mä ech mengen awer, fundamentale mussen se datselwecht kënnen ubidden. Mä natierlech, dat bedeit immens vill Investitiounen. Dat kascht eppes! Dat kascht Ensignanten an dat kascht Infrastrukturen, wa mer dat wëllen hunn.

Mä wa mer eng effentlech Schoul wëllen hunn, déi iwwerall geografesch alles ubitt oder quasi alles ubitt, wat een och an enger anerer Schoul huet, a Schoulen, wou och eng Kogestoun existéiert mat de Schüler a mat de Profen, déi och Projekte kënnen maachen, dat existéiert souwisou elo och schonn, mä déi e richtegt Matsproocherecht hunn, da kënnen mer an eng Richtung goen vun enger universaler effentlecher Schoul, déi sech awer och u Gegebenheete kann adaptieren, ausgoend vun den Erfahrung vum Leit, déi do liewen. E Beispill wier zum Beispill, jo, den „e-Skills“, also Informatikcoursen deemno wéi, well do wësse mer, datt dat immens wichteg ass.

Ech hunn zwar héieren, si wieren nach ëmmer net op der Héicht, deemno wéi. Virun 30 Joer, an den 90er Joren, wou et ugefaangen huet, do hate mer esou eppes total Debilles. „Logo“ huet dat geheescht, mat enger Schildkröt, déi... Enfin, dat war absurd, et huet kengem eppes bruecht. Mä anscheinend, hautzudaags, an dat wollt ech scho bal net gleewen, am Joer 2017 sinn d'Infoscoursen awer och nach e bësse vétuste. Vlächent ännert dat. Ech hoffen dat, mä op jidde Fall ass et wichteg.

Mä huele mer un, wann elo gewësse Gebaier dee Profil hunn, wou se dat och ubidden fir Informatikcoursen, also „e-Skills“ an esou weider, wat en immensen Invest wäert sinn... An dat wäert wahrscheinlech net all Schoul kënnen ubidden a si muss vlächent Drëttpartner fannen an esou weider, fir dat ze maachen, dann hu mer en Desequilibrium, well mir sinn der Meinung, datt all Schüler wierklech déi Skills muss hunn an der Informatik, quitte datt se déi meeschtens bal och scho beherrschen, eendeiteng besser wéi mir. Dofir mengen ech, dat ass eng Richtung, wou ee misst oppassen.

An dann nach eppes. Da schwätzen ech nach schnell zur Motioun. Englesch. Déi englesch Sprooch, bon, dat kléngt ëmmer gutt ze soen: „Englesch ass wichteg. Et ass déi international Sprooch. Jiddweree schwätzt Englesch op der Welt.“ Grosse erreur! A jiddweree schlecht. Also, vill Leit schwätze schlecht Englesch op der Welt. An déi, déi ganz gutt schwätzen, déi verstees de meeschtens net,...

(Hilarité)

...well Englesch eng richtig komplex Sprooch ass.

Dat heescht, et geet drëms: Natierlech muss een Englesch beherrsche kënnen, mä ze mengen, datt een ëmmer méi Englesch mécht, fir op en Niveau ze kommen, dee wierklech den Niveau vun engem Anglofone wier, vun engem Native Speaker, dat erreeche mer net, ausser déi, déi et wierklech wëlle studieren, déi an en anglofont Land ginn an esou weider.

Mä a Wierklechkeet, mir hu grouss Illusiounen doriwwer, well u sech geet e gewëssent Englescht duer. A ganz pousséiert Englescht au détriment da vu Sproochen, déi mer awer pour le coup wierklech richtig gutt mussen kënnen, wéi Franséisch an Däitsch, dat wier a mengen Ae keng gutt Iddi.

A Portugal hu se, ech weess net, virun 20 Joer ongeféier dat Franséisch als Friemsprooch duerch Englesch progressiv ersat, well se wollte modern sinn. Duerno koum d'Kris, 2008. A jonk Portugisen hu misse Portugal verloossen, vill a lusofon Länner wéi Brasilien an Angola. An déi aner, wuer? Mä do, wou grouss portugisesch Communautéten sinn: Lëtzebuerg natierlech, d'Belsch, d'Schwäiz - déi franséisch Schwäiz -, de Quebec, Frankräich, also Länner, wou Franséisch geschwat gëtt, mä si schwätze meeschtens nëmmen Englesch.

Do hate se e puer Schwierigkeeten. An dat mierkt een och hei. Ech mengen, do muss een e puer Illusiounen ofschafen. Dovunner ofgesinn, mir wäerten dofir dëst Gesetz net matstëmmen. An d'Motioun, ech mengen, do enthalte mer eis.

► **M. Mars Di Bartolomeo, Président.** - Merci. Domat huet d'Regierung d'Wuert: den Educatiounsminister, den Här Claude Meisch.

Prise de position du Gouvernement

► **M. Claude Meisch, Ministre de l'Éducation nationale, de l'Enfance et de la Jeunesse.** - Merci, Här President. Dir Dammen an Dir Hären, e Merci un alleguerten d'Riedner haut hei am Parlament. Ech denken awer och un all déi Deputéiert am Laf vun deene Joren, an et ware jo awer fënnf Joer, wou hei am Parlament, am Land, an der Gesellschaft dobaussen, virun allem och an de Schoulen, ronderëm d'Schoulen diskutéiert gouf; hinnen e Merci fir all déi Bäitrag, déi hei koumen, déi Reflexiounen, déi

geleescht goufen, déi finalement awer hei an engem Text konnten münden, dee mer haut elo hoffentlech wäerten unhuelen. Deen Text gouf virgestallt haut de Mëtteg hei vum Rapporteur Claude Lamberty. Him natierlech och e Merci fir déi schrëftlech a mëndlech Presentatioun.

Ech wëll nach eng Kéier op e puer Aspekter zrëckkommen, wann Der erlaabt.

Et ass gesot ginn, mir hätten hei net ganz besonnenes Courage gewisen, wat de Sproochenunterrecht ubelaangt. Ech froe mech, wat fir ee Courage et dann hätt misse sinn. Mir sinn amgaangen, permanent nei Sektioenen opzemaachen, déi eng aner Langue véhiculaire hunn. D'Gesetz vum Lycée Michel Lucius gouf viru Kuerzem hei gestëmmt. Bei der leschter Rentrée huet déi International Schoul zu Déiferdeng hir Dieren opgemaach mat deem Succès, dee mer kannt hunn, datt et bei der nächster Rentrée déi International Schoulen zu Déiferdeng an zu Esch wäerte sinn.

D'ailleurs kann ee sech d'Fro stellen, wou d'CSV beim Vott vun deem Gesetz war: Se huet et net matgedroen. Wien also do de Courage hat a wien net, dat sollte mer dann emol nach eng Kéier kucken.

Ech hunn och...

► **M. Claude Wiseler (CSV).** - Aus liicht anere Grënn awer.

► **M. Claude Meisch, Ministre de l'Éducation nationale, de l'Enfance et de la Jeunesse.** - Ech hunn och annoncéiert - et ass de Mëtten hei vum Claude Adam gesot ginn -, datt mer genau déi dote Schoulmodeller och wëllen ausbauen - en héiert et net esou gär -, fir awer och ënnerschiddlech Modeller ze hunn, déi d'Schüler da kënnen wielen, déi och hirer Sproochbiografie méi staark kënnen Rechnung droen.

► **M. Claude Adam (déi gréng).** - Esou ass dat ganz gutt, Här Minister.

► **M. Claude Meisch, Ministre de l'Éducation nationale, de l'Enfance et de la Jeunesse.** - An ech hu mer extra Méi ginn, Här Adam. Dir gesitt, wann ech mer Méi ginn, da klappt dat. Da klappt dat! Da klappt dat och, fir och deenen eenzelne Profiller vun de Schüler do méi staark kënnen Rechnung ze droen, datt mer déi Offer wëllen ausbauen am Zentrum vum Land, well et eng gratis international Offer ass, an och am Norde vum Land.

(Interruption)

Jonglënster ass net Zentrum, et läit awer no derbäi. Ech wëll lech soen, datt mer an Diskussiounen si mat der Schoul zu Jonglënster, fir do och eng international Offer ze maachen. Op jidde Fall eng germanofon Offer, fir och där Populatioun, déi sech oft an eisem reguläre Schoulsystem schweierdeet mam Franséischen, an där Region deementspriedend eng Offer kënnen ze bidden. Héchstwahrscheinlech och eng anglofon Offer derbäi, well mer och mierken, datt ganz vill engleschsproocheg Kanner an de Primärschoulen an där Region sinn, déi duerno och an international Privatschoule ginn, déi eigentlech guer kee Fouss an eis effentlech Schoul setze bis elo, fir deenen awer eng Offer kënnen ze maachen.

Datselwecht gëllt, wat déi germanofon Offer ubelaangt, och fir de Lycée vu Clierf. Och do si mer an der Diskussioun mat der Direktioun, déi mat hirer Equipp jo amgaangen ass, d'Rentrée 2018 ze preparieren, wann dat Gebai wäert opgoen. A mir viséieren och do d'Offer vun enger agreierter Europaschoul, wat eng zousätzlech Offer da virun allem och an deenen éischer ländlech strukturéierte Géigenden ass, wat eng Offer ass, déi bei dat derbäikënn, wat do besteet, a wat eng Offer ass, denken ech, déi, wa mer eis Analyse jo e bëssen eescht huelen, awer wéi d'Fauscht op d'A bei déi Populatioun, déi mer an deene Regionnen hunn, och passt. Ob et nieft enger germanofoner Offer zu Clierf och eng aner ass, eng frankofon, dat si mer nach amgaangen ze kucken.

Wann hei gesot gëtt, souwuel am Enseignement secondaire général wéi am Enseignement secondaire classique, wa mer se elo emol schonn esou wëllen nennen, géife mer d'Sproochen net differenzieren a mir géifen do all Schüler ee wéi deen anere behandelen, da wëll ech awer soen, datt et wuel Méiglechkeete gëtt, ze differenzieren: E Schüler huet d'Méiglechkeet, ze kompensieren an enger Sprooch, net nëmmen an enger Sprooch, mä an all Fach. E kann dat an der Regel iwwer seng ganz Schoulcarrière ewech maachen. Ass dat net eng Form vun Differenzierung, wann ech zum Beispill am Franséischen iwwer eng Rei vu Joren ewech do kompenséiert hunn, herno mäin Diplom och kréien an och do am Franséische kompenséiert hunn? Déi Méiglechkeet hu mer.

Mir hunn och d'Méiglechkeet d'ailleurs, fir Sproochen ewechzeloossen op den ieweschte Klassen, och am classesche Lycée. Dodrop elo

nach eng Kéier eng zousätzlech Differenzierung ze greffieren, dat ouni Reflexioun, ob déi Differenzierung, déi haut schonn existéiert, net awer scho problematesch vlächent wär, do warnen ech nun awer wierklech virdrun, well ech awer feststellen - an dëser Deeg si mer erëm amgaangen, Diplomer uechtert d'ganz Land ze verdeelen -, datt all Joer 1.200, 1.300 oder 1.400 Schüler e Premièresofschloss kréien aus dem classesche Lycée, dat um Niveau vun deenen dräi Sproochen, déi haut gefrot sinn. Wëlle mer systematesch deene Schüler d'Méiglechkeet huelen?

(Interruption par Mme Martine Hansen)

Oder... Neen, Madamm Hansen, loosst mech wann ech gelift ausschwätzen!

► **Mme Martine Hansen (CSV).** - Neen.

► **M. Claude Meisch, Ministre de l'Éducation nationale, de l'Enfance et de la Jeunesse.** - Ma neen, loosst mech wann ech gelift awer elo schwätzen!

Oder deene Schüler d'Förderung och net ginn an d'Ufuerderung och net ginn, fir datt se hir Sproochekompetenzen op deen doten héijen Niveau an deenen dräi Sproochen entwéckelen an deene siwe Joer, wou se am classeschen oder och am generelle Lycée sinn? Dat froen ech mech awer, ob dat dee richtige Wee ass, well mer awer duerno och musse Perspektive schafen an d'Beruffswelt eran, am Secteur public an och am Secteur privé, wou d'Sproochenufuerderunge sécherlech net méi kleng wéi am Secteur public sinn. Duerfir denken ech, ass dat net dee richtige Wee. An duerfir wëlle mer dat, wat haut gutt fonctionnéiert, bäibehalen, an do, wou mer nach net eng adequat Offer hu fir d'Schüler, do wëlle mer nach nei Offere schafen.

Wann dann nach gesot gëtt, wat d'Sproochen ubelaangt, hei hätt d'Regierung oder meng Persoun net deen néidege Courage, da kënnen mir d'nächst Woch kucken, wann hei iwwert déi multilingual Fréiförderung geschwat gëtt, wou de Courage dann erëm eng Kéier ganz, ganz grouss wäert sinn, wien dann hei vu Courage wäert strotzen.

Och d'Sektioenen à la carte opzemaachen, datt et net eng Schoul ass, déi seet: „Meng Sektioen gesäit esou aus an de Schüler hält se oder e geet vlächent an äänlech Sektioen an eng aner Schoul sichen“, mä datt de Schüler eigentlech à la carte do seet: „Ech hätt gären esou vill Franséisch an ech hätt gär esou vill Mathé an ech hätt gär esou vill Philosophie an esou vill Geschicht“, dat, denken ech, ass nun awer och net dee Modell, deen et ka sinn!

Ech wëll elo hei guer net herno vun enger Première schwätzen, wou een nach Turnen an Zeechnen hat an nach e bësse Philo gemaach huet. Dat wëll ech hei guer net maachen. Dat kréiche mer nach evitéiert. Mä, Madamm Hansen, Dir hutt eis virgeworf, wat net stëmmt, mir hätten d'Direkteren hei net genuch mat agebonnen. Et ass op Urode vun den Direkteren, datt mer vun deem dote Modell, deen effektiv an der Diskussioun war, d'Fanger ewechgelooss hunn, virun allem op Urode vun den Direkteren aus Schoulen, déi net eng grouss Capacitéit hunn, déi am ländleche Raum sinn, well déi gesot hunn: „Dat doten iwwerschreit eis Capacitéit, mir kréien dat doten net organiséiert. Et gëtt e Chaos, wéi mer en an der Formation professionnelle erlieft hunn.“ An duerfir si mer vun deem dote Modell ofgeréckelt.

Eis elo hei ze reprochieren, mir géifen eppes maachen, wat eigentlech de Wahlméiglechkeete fir de Schüler net géif gerecht ginn am ländleche Raum, dat fannen ech nun awer e staarkt Stéck! Gradesou wéi e staarkt Stéck ass, hei ze behaupten, mir hätten net genuch mat den Direktiounen diskutéiert. Mir hu mat en alleguerten diskutéiert. Mir hunn am Grousse an am Kleng mat hinnen diskutéiert a villes, ënner anerem dat heiten, ass nogelauschtert ginn an ass an dee Projet hei mat agefloss.

(Brouhaha)

► **M. Mars Di Bartolomeo, Président.** - Här Minister, Dir erlaabt eng Präzisioun vun der Madamm Hansen?

► **M. Claude Meisch, Ministre de l'Éducation nationale, de l'Enfance et de la Jeunesse.** - Jo. Wa meng Zäit gestoppt gëtt, dann erlaben ech et.

► **M. Mars Di Bartolomeo, Président.** - Selbstverständlech.

► **Mme Martine Hansen (CSV).** - Ech war direkt ugeschwat ginn. Merci, Här President. Dat, wat den Här Minister hei seet, ass u sech, datt e mat den Direkteren wahrscheinlech iwwer verschidde Règlement-grand-ducalles geschwat huet. Ech hunn an der Kommissioun gefrot, ob een Avis vun den Direkteren, vum Collège des directeurs do wier. Du war relativ laang iwwerhaupt näischt gesot ginn an da krute mer gesot: „Ben, et wieren eenzel Punkten ugeschwat



ginn, a verschiddene Rapporte misst een dat erëmfannen.“

Dunn hunn ech gefrot, ob mer déi Rapporten da kéinte kréien, mä mir hunn näischt kritt. Also, et ass definitiv keen Avis vum Collège des directeurs iwwert dës Gesetz do. Merci.

► **M. Claude Meisch**, *Ministre de l'Éducation nationale, de l'Enfance et de la Jeunesse*.- Dat heescht jo net, datt net mat den Direktiounen geschwat ginn ass! Ech si während iwwer engem ganze Schouljoer, an dat huet mech iwwer en hallwen Dag an der Woch kascht, duerch d'Schoule gaangen. Ech hu mat 45 Lycéeën diskutiert: mat den Direktiounen, mat de Profecomitéen, mat den Elterecomitéen, mat de Schülercomitéen, mat de Vertrieeder vum SPOS a mat deene vun der educativer Equip. Mir hunn diskutiert a mir hunn nogelauschert. Virun allem hu mer nogelauschert! Da soll awer keen heihinnerkommen a soen, mir hätten hei net dat Gesetz do an déi Iwwerleeungen am Dialog mat all deene Concernéierten um Terrain developpéiert! Da froen ech mech awer, wat een dann ënner Dialog ka verstoen!

A mir hunn eenzel Punkten...

(Interruption)

A mir hunn eenzel Punkten och mam Collège des directeurs diskutiert a souguer mat, ech wëll net soe verhandelt, mä verbessert. Mä wann ech um Dësch setzen an ech diskutieren eppes mat, wat mécht dat fir e Sënn, duerno nach eng Kéier en Avis derzou ofzeginn? Et ass dach vill méi produktiv, amplaz dat mir am Ministère eppes maachen an den Direkteren et pour avis ginn a mat deem Avis maachen, wat mer wëllen, bei d'Direkteren ze goen, mat hinnen ze schwätzen a mat hinnen dat ofzemaachen. Ënner anerem dee Punkt, deen ech elo hei gesot hunn, dee mer ganz besonnesch um Häre louch.

► **Plusieurs voix**.- Très bien!

► **M. Claude Meisch**, *Ministre de l'Éducation nationale, de l'Enfance et de la Jeunesse*.- E Wuert nach zu där Approche, déi, mengen ech, awer an eenzelne Käpp nach ëmmer dran ass, datt all Schoul d'selwecht misst fonctionnéieren; notament d'CSV huet awer och staark an déi dote Richtung hei argumentéiert. Mir loosse de Schoule gäre Fräiraum. Mir loosse de Schoule gäre Fräiraum, well ganz vill Positives entstanen ass am Laf vun deene leschte Joren. Dat ass net mäi Meritt. Dat ass de Meritt vun deenen Enseignanten, vun deenen Educateurs, vun deenen Direkteren an deenen Adjoints, déi an deene jeeweilige Gebaier hei am Land Verantwortung iwwerhuelen, déi d'Problemer gesinn hunn an déi Léisungen dorobber fonnt hunn.

Vun uewen erof elo ze soen, datt d'Orientatioun esou muss goen, datt et fir Inklusioun just ee Wee gëtt, datt et fir d'Diskussioun mat den Eltere just eng Method dierf sinn, dat ass jo awer falsch, well et alles dat futti mécht, wat en place ass, well et déi Leit demotivéiert, déi dat doten opgebaut hunn. An ech weess emol net, wien een am Gebai herno nach eng Kéier misst motivéieren an iwwerhaupt géif fannen, fir nach eng Kéier nei de Steen de Bierg eropzerullen. A mir wësse jo awer, datt mer dann a konfliktsituatiounen gewiescht wären.

A fir dëst Gesetz hei ëmzesetzen, do brauche mer Rou, mer brauche Vertrauen, mer brauchen och de Konsens mat den Akteuren an der Schoul, déi gleewen, datt dat heiten eppes Festes ass, wat fir si vu Bedeitung ass. An ech kann lech soen, ech sinn am Laf vun deene leschten Deeg vill op Diplomiewerreechunge gewiescht, an iwwerall, iwwerall, wann ech mat den Direkteren a mat den Enseignantë geschwat hunn, ass gesot ginn: „Hoffentlech kënnt dat dote Gesetz elo, well mer brauchen et! Well et e Kader ass fir eis Weiderentwécklung, esou wéi mir se hei um Terrain gesinn.“

Da wëll ech nach kuerz drop agoen, datt hei gemaach ginn ass, wéi wann elo d'Participatioun vun den Elteren an de Schüler géif ofgewäert ginn. Ech wëll lech soen, datt mer all Schoul eng Demarche hei operleën am Kader vun dem Plan de développement scolaire, sech musse Methoden ze entwéckelen, wéi se mat Elteren an och mat Schüler participativ zesummeschaffen. Dat ass nei. Dat ass eng Obligatioun, déi huet elo Gesetzeskraaft, wann dee ganze Pak hei a Kraaft ass. Da froen ech mech wierklech, wou een drop kënnt, datt eigentlech elo do manner Participatioun méiglech wär a gewënscht wär.

Och wann een elo hei seet: „Et gëtt keen elektronesch Klassebuch.“ Dach, et gëtt elektronesch Klassebicher, déi a ganz ville Schoulen haut och scho gebraucht ginn. Et ka sinn, datt et nach net iwwerall de Fall ass, mä och do wäerte mer de Schoulen eng Demarche operleën, eng gesetzlech virgeschriwwen Demarche am Kontext vum Plan de développement scolaire. Och do musse sech ganz konkret Gedanken gemaach ginn a Projeten ent-

wéckelt ginn, wéi d'Digitaliséierung an hirer Schoul wäert weidergoen, wéi de Prozess vun den iPad-Klasse wäert weidergoen, a wat fir enge Fächer datt se dat wäerte maachen, mat wat fir enge Formatiounen fir d'Enseignanten dat wäert gemaach ginn, wéi d'Kommunikatioun tëscht Elteren, Enseignanten an och de Schüler ka gestärkt ginn, och iwwert deen dote Wee, iwwert déi digital Outilen, dat wäert alles dorannerfléissen. An déi Schoulen hu sech duerno drun ze halen. Hei de Contraire ze inszenéieren (veuillez lire: insinuéieren), do froen ech mech wierklech, wéi een dann dorobber kënnt!

Gradesou wéi wann ee seet, den Travail d'envergure wär ersatzlos gestrach ginn. Deen ass net ersatzlos gestrach ginn! Mir hu mëttlerweil Schoulen - an et misst ee wierklech emol an d'Schoule kucke goen, wat do lass ass, wéi lieweg déi ass a wéi innovativ den Terrain an de Schoulen ass -, déi sech als Entrepreneurshipschoulen definéieren, déi ganz genau an deem dote Projetsgeescht fonctionnéieren. An dat net nëmmen op enger Deuxième, mä dat iwwer all hir Klassen, wat mer encouragéieren, wou mer bonnes Pratiques sammeln, wat mer vernetze mat deenen anere Schoulen a lues a lues wäerte kënnen eriwergoen. Et muss een awer esou éierlech sinn, datt, wa mer an der Zilsetzung eis eens sinn a mir nennen dat vläicht op eemol aneschtens, een dann net heihinnerkënn a seet, dat wär alles aus dem Projet gestuerwen an dat wär erausgestrach ginn. Dat, denken ech, ass net deen Debat, dee mer hei sollte féieren.

Här President, ech gesinn, d'Zäit leeft mer fort. Duerfir wëll ech ganz kuerz nach eng Kéier dorobber ze schwätze kommen, datt hei gesot gëtt, dat wär e klengt Gesetz, do wäeren net vill Ännerungen dra gewiescht. Ech weess, datt dat hei net haut decidéiert wäert ginn, dat muss iergendwann duerno eng Kéier beuerteelt ginn, wat dann den Impakt vun dësem Gesetz op d'Entwécklung vun de Lycéeën alleguerten doruechter war. Ech soll et net decidéieren a gradesou wéineg, mengen ech, oblait et engem aneren, hei ze decidéieren, well jiddwereen huet jo wahrscheinlech eng virgefaasste Meenung.

Ech liesen awer, wa sech doruechter an anere Länner, an Nopeschlänner momentan Regierunge bilden a Regierungsprogrammer geschriwwen ginn, wat sech do fir eng ganz Regierungsperiod virgeholl gëtt an der Educatioun. A wann ech kucken, wat mer mat dësem Pak elo fir de Secondaire hei zu Lëtzebuerg alles wäerten änneren, da weess ech net, wat déi aner Länner maachen. Well da steet eigentlech do guer näischt méi dra par rapport zu deem grouse Pak, dee mer hei awer haut de Mëtteg zum Vott brénge respektiv iwwer aner Weeër schonn a Kraaft triede gelooss hunn.

A wann dann...

(Interruptions)

Dir hutt eist kuerzt Gespréich de Moien um Radio, Madamm Hansen, jo ugeschwat gehat. Wann dann do d'Fro gestallt gëtt: „Jo, wat géift Dir dann duerno änneren an engem Gesetz, wat Dir als eng mini Mikroreform bezeechent?“, an d'Ännerung duerno ass awer an der Nanodimensioun, déi Der duerno ukënegt...

(Hilarité)

...da froen ech mech awer...

► **Mme Martine Hansen** (CSV).- ...jo nach net fest.

► **M. Claude Meisch**, *Ministre de l'Éducation nationale, de l'Enfance et de la Jeunesse*.- Da froen ech mech awer wierklech,...

(Brouhaha)

► **M. André Bauler** (DP).- Zéng exposant minus néng.

► **M. Claude Meisch**, *Ministre de l'Éducation nationale, de l'Enfance et de la Jeunesse*.- ...wéi eng Kopplabunz...

(Interruption)

...datt een do muss schloen, fir nach iergendwéi riicht stoen ze bleiwen.

Mir hunn, Här President, mat deem Gesetz hei viles a Bewegung bruecht, schonn ier d'Gesetz gestëmmt ass, well sech an all de Schoulen déi Iwwerleeungen do gemaach gi vum Profill vun der Schoul, vun aneren Offeren, déi kënnen entstoën, vun anere Mechanismen, déi mussen en place gesat ginn, fir datt d'Schüler besser encadréiert ginn, fir datt d'Schoul sech méi staark de Besoine vun de Schüler upasst a fir datt d'Schoul sech och méi staark dem Besoin vun der Gesellschaft kann upassen. A mat deem Gesetz wäert dat sécherlech nach eng Kéier un Tempo gewannen. Duerfir wëll ech deenen Deputéierte Merci soen, déi de Mëtteg hei mat derfir stëmmen.

E Wuert nach, Här President, vläicht zur Motioun, wann Der erlaabt.

► **M. Mars Di Bartolomeo**, *Président*.- Jo.

► **M. Claude Meisch**, *Ministre de l'Éducation nationale, de l'Enfance et de la Jeunesse*.- Ech géif kuerz wëlle soen, datt mer éischters Schoulen hunn, wou d'Englescht ab der Septième enseignéiert gëtt.

Zweetens wëll ech awer soen, datt ech et scho skurrill fannen, wa vun enger Partei proposéiert gëtt, déi hei seet, mir misste méi dialogéieren, méi mat de Gremie schwätzen, datt elo op eemol d'Chamber hei soll decidéieren, ouni datt mat iergendengem geschwat ginn ass, datt generell misst Englesch an all de Schoulen, ob se dat wëllen oder net, op Septième agefouert ginn. Dat fannen ech nun awer e bësse gelungen.

Ech schwätze jo mat deene Leit. An déi soe mer, d'Programmkommissioun am Engleschen, déi roden eigentlech dovunner of, dat dote systematesch ze maachen, well se soen: „Et ass besser, mir maachen et mat sechs Stonnen intensiv op der Sixième, wéi mat zwou oder dräi Stonnen unzefänken op der Septième.“

Trotzdem ënnerstëtze mer déi Projeten innerhalb vun der Schoulautonomie, fir et och schonn ab der Septième ze maachen. Dat gëtt den Elteren an de Schüler d'Méiglechkeet, dohinner ze goen an déi Schoul ze wien, wou et ugebuede gëtt, wa se dat da wëllen a wa se dat dann interessant fannen. An ech fannen, datt mer momentan op jidde Fall sollen derbäibleiwen, well et jo nach ganz, ganz aner Repercussione géif mat sech bréngen, ënner anerem d'Fro: Wat géife mer da manner op der Septième maachen? Déi wier jo och nach ze tranchéieren. An déi hunn ech weder an der Motioun nach an der Diskussioun hei gekläert erëmfont. Duerfir wär ech éischer frou, wa mer zu dësem Zäitpunkt déi Motioun do net géifen zrëckbehalen.

Merci.

► **Plusieurs voix**.- Très bien!

► **M. Mars Di Bartolomeo**, *Président*.- Merci. Domat si mer um Enn vun eisen Diskussiounen ukomm.

A mer géifen direkt iwwert de Projet de loi 7074 ofstëmmen.

Vote sur l'ensemble du projet de loi 7074 et dispense du second vote constitutionnel

D'Ofstëmmung fänkt un. Fir d'Éischt déi perséinlech Stëmmen, dann d'Procuratiounen.

An d'Ofstëmmung ass ofgeschloss: 32-mol Jo, 28-mol Neen. Domat ass de Projet ugeholl.

Ont voté oui: MM. Marc Angel, Frank Arndt, Alex Bodry, Mmes Taina Bofferdin, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lambert, Edy Mertens et Mme Lydie Polfer (par M. André Bauler);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter (par Mme Josée Lorsché) et M. Roberto Traversini (par M. Claude Adam).

Ont voté non: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf (par Mme Nancy Arendt), Mmes Martine Hansen, Françoise Hetto-Gaasch, MM. Aly Kaes (par M. Laurent Mosar), Marc Lies, Mme Martine Mergen, M. Paul-Henri Meyers (par M. Félix Eischen), Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz (par M. Claude Wiseler), Serge Wilmes, Claude Wiseler, Michel Wolter et Laurent Zeimet;

MM. Gast Gibéryen, Fernand Kartheiser et Roy Reding;

MM. Marc Baum et David Wagner.

Ass d'Chamber bereet, d'Dispens vum zweete verfassungsméisge Vott ze froen?

(Assentiment)

Merci. Dann ass dat esou decidéiert.

An, esou wéi ech gesinn, si mer domat bal um Enn vun eiser Diskussioun, wa mer net nach d'Motioun hätten.

Motion 1

Ech froen, wie Stellung zur Motioun wëllt bezeien. Selbstverständlech fir d'Éischt... Ech mengen, den Auteur huet se presentéiert?

(Assentiment)

Ginn et Wuertmeldungen derzou? Den Här Adam an den Här Kartheiser.

Den Här Adam huet als Éischt d'Wuert.

► **M. Claude Adam** (*déi gréng*).- Merci, Här President. Wéi ech elo gesinn hunn, datt ech als Eenzeg nach vun der Majoritéit wëll schwätzen, hunn ech mech trotzdeem gemellt. Ech hunn näischt un der Erklärung vum Minister aussetzen. Ech wëll awer nach eng Kéier betounen, datt ech et schonn eng komesch Approche fannen. Mir sinn eis alleguerten eens, datt d'Englesch Sprooch eng wichteg Roll spillt an déi Roll gëtt och ëmmer méi grouss, mä ech sinn awer och der Meenung, grad wéi de Minister, datt mer am Dialog mat de Schoule solle schwätzen, ob mer do eng Ännerung maachen.

An zweetens warnen ech awer och viru Schnell-schëss, besonnesch an där heiten Debat! Einfach de Fait, datt d'Englescht um Virmarsch ass, kann awer net heeschen, datt mer da fir jiddwereen op Septième d'Englescht aféieren als Cours, well mer eis éischters mussen iwwerleeën: Op d'Käschte vu wat geet dat? Wat huele mer dann ewech?

► **Une voix**.- ...an der Motioun!

► **M. Claude Adam** (*déi gréng*).- Wat kënnt amplaz?

An zweetens hätt ech och gären eng Analys, datt mer wéissten: Wou si mer dann iwwerhaupt dru mam Engleschen an eise Schoulen? Wivill Englesch kënnen eis Schüler? Ech hunn den Androck, wéi wann déi Generatiounen no eis am Engleschen op enger Première méi wéisste wéi mir an der Zäit, am Franséischen eventuell net esou vill. Dann hätt ech awer och gären, datt mer dat géifen analyséieren an do-rauser Konklusiounen zeien an net hei mat engem quasi Schnellschoss wëlle probéieren, sämtleche Lycéeën ze imposéieren, fir Englesch op Septième ze maachen.

Duerfir stëmme mir natierlech net fir dës Motioun.

► **M. Mars Di Bartolomeo**, *Président*.- Dann nach den Här Kartheiser.

► **M. Fernand Kartheiser** (*ADR*).- Jo, villmools Merci, Här President. Ech war e bësse verwonnert, wéi ech dësen Text gesinn hu vun der CSV. Nodeem den Här Juncker gesot huet, datt Englesch ëmmer manner wichteg géif ginn a Franséisch ëmmer méi wichteg géif ginn, kënnt d'CSV zu Lëtzebuerg elo...

(Brouhaha)

...mat engem Geste, deen an déi aner Richtung geet.

Et ass awer fir eis esou, fir elo iwwert den Text selwer ze schwätzen, et feelt eng ganz wichteg Präzisioun an dësem Text. Mir sinn eis als ADR, wéi all Mënsch heibannen, mengen ech, vollkomme bewosst, datt Englesch net nëmmen eng wonnerschéi Sprooch ass, mä eng wichteg Sprooch, an datt mer frou wären, wann esou vill Leit wéi méiglech déi Sprooch op engem ganz héijen Niveau géife schwätzen. Mä awer fir iwwert d'Schoul hei ze schwätzen, misste mer wëssen, an et steet net dran, ob d'CSV gär hätt, datt mer obligatoresch Englesch op Septième sollen aféieren oder fakultativ Englesch op Septième sollen aféieren.

Dat ass eng aner Diskussioun. Wann et fakultativ ass, begrësse mer dat selbstverständlech. Wann et obligatoresch ass, dann hu mir als ADR awer eng grondsätzlech Positioun: Mir hunn eng Situatioun, wou eis eegen National-sprooch, eng vun eisen dräi Verwaltungssproochen, näamlech Lëtzebuergesch, net duerch dëst Gesetz gestärkt gëtt. Wou mer ëmmer soen, datt op Lëtzebuergesch op Septième soll obligatoresch och méi seriö enseignéiert ginn, mat Grammaire, mat Literatur, an net nëmmen op Septième op anere Sproochen.

An eis Prioritéit, wann et drëm geet, nei obligatoresch Coursen anzeféieren, dat ass selbstverständlech bei eiser Nationalsprooch, bei Lëtzebuergesch. Wann also d'CSV eis seet, datt et eng fakultativ Initiativ ass, da stëmme mer hir Motioun gäre mat. Wann et awer drëm geet, fir obligatoresch Englesch anzeféieren, da soe mir als ADR: „Nee merci. Eis Prioritéit ass eis Nationalsprooch.“

Ech soen lech Merci.

► **Une voix**.- Très bien!

► **M. Mars Di Bartolomeo**, *Président*.- Merci.

► **Mme Martine Hansen** (CSV).- Däerf ech äntwerten?

► **M. Mars Di Bartolomeo**, *Président*.- Madamm Hansen, selbstverständlech.

► **Mme Martine Hansen** (CSV).- Just eng Äntwert. Also mir haten...



► **Une voix.**- Do gëtt et keng Koalitioun méiglech.

► **Mme Martine Hansen** (CSV).- Mir hate scho gemengt obligatoresch, well fakultativ ass am Prinzip elo schonn alles méiglech bei de Schoulen.

► **Plusieurs voix.**- Ah!

► **Mme Martine Hansen** (CSV).- Also hate mer scho gemengt obligatoresch. Merci.

► **M. Mars Di Bartolomeo**, *Président.*- Merci. Keng weider Wuertmeldungen? Da kënnen mer zur Ofstëmmung iwwert d'Motioun iwwergoen.

Vote sur la motion 1

Fir d'Éischt déi perséinlech Stëmmen. D'Procu-

rationne sinn ennerwee.

An d'Ofstëmmung ass eriwwer: 24-mol Jo, 36-mol Neen. Domat ass d'Motioun 1 ofgeleent.

Résultat définitif après redressement: la motion 1 est rejetée par 37 voix contre et 23 voix pour.

Ont voté oui: Mmes Diane Adehm, Sylvie Andrich-Duval, Nancy Arendt, MM. Emile Eicher, Félix Eischen, Léon Gloden, Jean-Marie Halsdorf (par M. Laurent Mosar), Mmes Martine Hansen, Françoise Hetto-Gaasch, MM. Aly Kaes (par Mme Nancy Arendt), Marc Lies, Mme Martine Mergen, M. Paul-Henri Meyers (par Mme Martine Mergen), Mme Octavie Modert, MM. Laurent Mosar, Marcel Oberweis, Gilles Roth, Marco Schank, Marc Spautz (par Mme Octavie Modert), Serge Wilmes, Claude Wiseler, Michel Wolter et Laurent Zeimet.

Ont voté non: MM. Marc Angel, Frank Arndt, Alex Bodry, Mmes Taina Bofferding, Tess Burton, M. Yves Cruchten, Mme Claudia Dall'Agnol, MM. Mars Di Bartolomeo, Georges Engel, Franz Fayot, Claude Haagen, Mme Cécile Hemmen et M. Roger Negri;

MM. André Bauler, Gilles Baum, Mme Simone Beissel, M. Eugène Berger, Mme Anne Brasseur, M. Lex Delles, Mme Joëlle Elvinger, MM. Gusty Graas, Max Hahn, Alexander Krieps, Claude Lamberty, Edy Mertens et Mme Lydie Polfer (par M. Gusty Graas);

MM. Claude Adam, Gérard Anzia, Henri Kox, Mmes Josée Lorsché, Viviane Loschetter (par M. Claude Adam) et M. Roberto Traversini (par M. Henri Kox);

MM. Gast Gibéryen, Fernand Kartheiser et Roy

Reding;

MM. Marc Baum et David Wagner.

A mir sinn um Enn vun eisen Aarbechte vun de


Mëtten ukomm. Ech soen lech Merci a ginn

lech Rendez-vous fir déi nächst ëffentlech

Sëtzung den nächsten Dënschdeg.

Merci! An d'Sëtzung ass eriwwer.

(Fin de la séance publique à 17.34 heures)



SÉANCE 46

MARDI,
11 JUILLET 2017

Présidence: Mme Simone Beissel, Vice-Présidente

Sommaire

- Ouverture de la séance publique
 - Mme Simone Beissel, Vice-Présidente
- Communications
 - Mme Simone Beissel, Vice-Présidente
- Ordre du jour
 - Mme Simone Beissel, Vice-Présidente
- 7089 - Projet de loi portant approbation de la Convention de Minamata sur le mercure, adoptée à Genève le 19 janvier 2013
 - Rapport de la Commission de l'Environnement: M. Henri Kox
 - Discussion générale: M. Marco Schank, M. Roger Negri, M. Max Hahn
 - Prise de position du Gouvernement: Mme Carole Dieschbourg, Ministre de l'Environnement
 - Vote sur l'ensemble du projet de loi
- 7090 - Projet de loi 1. modifiant la loi modifiée du 10 juin 1999 relative aux établissements classés, 2. modifiant la loi modifiée du 9 mai 2014 relative aux émissions industrielles
 - Rapport de la Commission de l'Environnement: M. Henri Kox
 - Discussion générale: M. Marcel Oberweis, M. Roger Negri, M. Max Hahn, M. David Wagner
 - Prise de position du Gouvernement: Mme Carole Dieschbourg, Ministre de l'Environnement
 - Vote sur l'ensemble du projet de loi et dispense du second vote constitutionnel
- 7089 - Projet de loi portant approbation de la Convention de Minamata sur le mercure, adoptée à Genève le 19 janvier 2013 (suite)
 - Dispense du second vote constitutionnel
- 7134 - Projet de loi relatif à la construction d'un Lycée technique pour professions de santé et d'un hall des sports Logopédie à Strassen
 - Rapport de la Commission du Développement durable: Mme Josée Lorsché
 - Discussion générale: M. Aly Kaes, M. Georges Engel, M. Gusty Graas
 - Prise de position du Gouvernement: M. François Bausch, Ministre du Développement durable et des Infrastructures
 - Vote sur l'ensemble du projet de loi et dispense du second vote constitutionnel
- 7064 - Projet de loi portant modification
 - de la loi modifiée du 4 juillet 2008 sur la jeunesse;
 - de la loi du 18 mars 2013 relative aux traitements des données à caractère personnel concernant les élèves
 - Rapport de la Commission de l'Éducation nationale, de l'Enfance et de la Jeunesse: M. Gilles Baum
 - Discussion générale: Mme Françoise Hetto-Gaasch (interventions de M. le Ministre Claude Meisch et Mme Martine Hansen), M. Claude Lamberty (interventions de Mme Martine Hansen, M. Claude Wise-

ler, M. Max Hahn et M. Eugène Berger), M. Claude Haagen, M. Claude Adam, M. Fernand Kartheiser, M. David Wagner

- Prise de position du Gouvernement: M. Claude Meisch, Ministre de l'Éducation nationale, de l'Enfance et de la Jeunesse (interventions de Mme Martine Hansen et M. Claude Wiseler)

- Vote sur l'ensemble du projet de loi et dispense du second vote constitutionnel

9. 7010 - Projet de loi portant introduction du cours commun «vie et société» dans l'enseignement fondamental et modifiant

1. la loi modifiée du 6 février 2009 portant organisation de l'enseignement fondamental;

2. la loi modifiée du 6 février 2009 concernant le personnel de l'enseignement fondamental;

3. la loi du 6 février 2009 relative à l'obligation scolaire

- Rapport de la Commission de l'Éducation nationale, de l'Enfance et de la Jeunesse: M. Lex Delles

- Discussion générale: M. Laurent Zeimet (interventions de M. le Ministre Claude Meisch, Mme Viviane Loschetter, M. Claude Lamberty, M. le Ministre Claude Meisch et M. Franz Fayot), M. Claude Lamberty (interventions de M. Laurent Zeimet), M. Georges Engel (interventions de Mme Martine Hansen et M. Laurent Zeimet), M. Claude Adam (intervention de M. Laurent Zeimet), M. Fernand Kartheiser (intervention de M. Lex Delles), M. David Wagner (interventions de M. Georges Engel)

- Prise de position du Gouvernement: M. Claude Meisch, Ministre de l'Éducation nationale, de l'Enfance et de la Jeunesse (intervention de M. Laurent Zeimet)

- Vote sur l'ensemble du projet de loi et dispense du second vote constitutionnel

10. 7078 - Projet de loi portant organisation de la reprise des enseignants de religion et des chargés de cours de religion et portant modification de

1. la loi modifiée du 6 février 2009 concernant le personnel de l'enseignement fondamental;

2. la loi modifiée du 10 juillet 1998 portant approbation de la Convention du 31 octobre 1997 entre le Gouvernement, d'une part, et l'Archevêché, d'autre part, concernant l'organisation de l'enseignement religieux dans l'enseignement primaire

- Rapport de la Commission de l'Éducation nationale, de l'Enfance et de la Jeunesse: M. Lex Delles

- Discussion générale: M. Laurent Zeimet, M. Georges Engel, M. Claude Adam, M. Fernand Kartheiser

- Prise de position du Gouvernement: M. Claude Meisch, Ministre de l'Éducation nationale, de l'Enfance et de la Jeunesse (intervention de M. Fernand Kartheiser)

- Vote sur l'ensemble du projet de loi et dispense du second vote constitutionnel

11. 7127 - Projet de loi portant modification de la loi modifiée du 21 septembre 2006 sur le bail à usage d'habitation et modifiant certaines dispositions du Code civil

- Rapport de la Commission du Logement: M. Max Hahn

- Discussion générale: M. Marc Lies, Mme Taina Bofferding, M. Claude Adam, M. David Wagner

- Prise de position du Gouvernement: M. Marc Hansen, Ministre du Logement

- Vote sur l'ensemble du projet de loi et dispense du second vote constitutionnel

Au banc du Gouvernement se trouvent: M. François Bausch, M. Claude Meisch, Mme Corinne Cahen, Mme Carole Dieschbourg et M. Marc Hansen, Ministres.

(Début de la séance publique à 14.32 heures)

1. Ouverture de la séance publique

► **Mme Simone Beissel**, *Présidente de séance.*- Dir Dammen an Dir Hären, gudde Mëtteg! Ech maachen heimat d'Chambers-sëtzung vum 11. Juli 2017 op.

Ech wollt direkt d'Regierung froen, ob se wëllt eng Kommunikatioun maachen.

(Négation)

Dat schéngt mer net de Fall ze sinn.

2. Communications

Da wollt ech verschidde Kommunikatiounen maachen:

1) Déi éischt Kommunikatioun betrëfft d'parlamentaresch Ufroen, déi erakomm sinn. Déi sinn um Büro deposéiert.

2) Déi zweet betrëfft d'Projet-de-loien, déi säit där leschter Sëtzung erakomm sinn. Déi sinn un d'Parteien an déi politesch Sensibilitéite verdeelt ginn.

3) An dat Drëtt: Gradesou sinn och d'Petitiounen, déi erakomm sinn, un d'Parteien an déi politesch Sensibilitéite verdeelt ginn.

Communications du Président - séance publique du 11 juillet 2017

1) La liste des questions au Gouvernement ainsi que des réponses à des questions est déposée sur le bureau.

Les questions et les réponses sont publiées au compte rendu.

2) Le projet de loi suivant a été déposé à l'Administration parlementaire:

7159 - Projet de loi portant approbation de l'accord de dialogue politique et de coopération entre l'Union européenne et ses États membres, d'une part, et la République de Cuba, d'autre part, fait à Bruxelles, le 12 décembre 2016

Dépôt: M. Jean Asselborn, Ministre des Affaires étrangères et européennes, le 05.07.2017

3) Les demandes de pétition publique et la demande de pétition ordinaire suivantes ont été déposées:

822 - Demande de pétition publique: Änderung des Code de la route - Erlaubnis für Motorradfahrer sich am Stau vorbeizuschlängeln - Gesetzesanpassung nach österreichischem Vorbild

Dépôt: M. Frederic Becker, le 20.06.2017

823 - Demande de pétition publique: Création/modification du Code de la route afin de protéger les cyclistes sur les routes du Luxembourg

Dépôt: M. Fabricio Prado Cauche, le 21.06.2017

824 - Demande de pétition publique: D'Verréckel vum Datum vun den Noexamen fir d'Ofschlossklassen am Enseignement secondaire a secondaire technique

Dépôt: M. Jeff Trierweiler, le 27.06.2017

825 - Demande de pétition publique: Indépendance des mandats au Luxembourg